


NSUNGI YA DIBUUNDU

YA THYATIRE

 Ntangu yayi na nkokila yayi beto ke . . . Kaka ntete beto kota na nsungi ya dibuundu ya nene yayi. . . Mu—mu banza kaka ti Mfumu ya beto ke tsyamuna Mpeve ya Yandi na zulu ya beto kaka . . . mpe ke sakumuna beto dyaka. Mpe beto lenda simba kaka mambu ya ngudi na ntangu yayi samu ti, na mambu ya nene yina ke na kwiza, beto ke vwanda awa sabala nyonso ya muvimba. Mpe, oh, mazono na nkokila beto kuzwaka ntangu mosi ya nkembo!

² Mbote, ntangu yayi kaka ntete beto tanga Masonuku, beto lenda soba kaka kisika ya beto—ya beto samu na mwa ntangu fyoti mpe kutelama samu na mpova ya kisambu.

³ Tata ya beto ya Mazulu ya Lemvo, beto ke na kwiza na Nkumbu yina kele nyonso ya kulunga ya Mfumu Yesu, na kuzabaka ti kilumbu Nge ke kwiza. Mpe beto ke na kumekaka na kukubika bantima ya bantu samu na kuzwa luzayikisu ya nene yayi ti Nge kele Mwana ya Nzambi ya moyo; ya kufwa ve, kasi kele ntangu nyonso ya moyo; mpe ke na kuzingaka na kati ya Dibuundu ya Nge mutindu Kimbangi ya Pantekote, ya ntangu ya nene yina ntangu kilumbu ya kupema zolaka katuka na Mvwandulu ya Mfumu. Beto kele na kyese mingi na kusepela bilumbu yango awa na manima ya bankama kumi na yivwa ya bamvula.

⁴ Mpe, Tata, beto na kulemvuka me yinikisa bayintu ya beto na buzitu samu na bantu yayi ya nene na nzila ya bansungi, bambwetete yango yina Nge simbaka na diboko ya Nge, bayina Nge tubaka vwanaka, “bawanzio ya Bansungi ya Dibuundu,” milongi. Mutindu beto ke tonda Nge samu na Santu ya nene Paul, ya Ephèse. Mutindu beto ke tonda Nge samu na Irénée, O Mfumu, Irénée kisadi ya Nge ya nene; mpe samu na Santu Martin; mpe na nkokila yayi samu na Santu Colomba. Mfumu, mutindu beto ke tonda Nge samu na bantu yayi. Na kati ya mutindu ya Rome ya mudidi, bumpani yina vwanaka kota na dibuundu, bawu nwanaka na ngolo nyonso samu na Nsangu ya pantekote mpe lusakumunu, kuzonza na bandinga, mpe—mpe bidimbu ya nene mpe mambu ya ngitukulu, kubeluka ya bambevo, mpe kuvumbuka ya bantu ya kufwa.

⁵ Mingi ya bawu, Mfumu, ba nyokulaka, mpe kufwaka, mpe ba pesaka na kudya na bankosi; bima ya nene kusalamaka. Ntoto kele ya kifuluka na menga ya bantu ya kudedama. Mpe, Tata, menga ya bawu ke na kubokaka bubu yayi na

kuteleminaka dibuundu yango ya yimbi mpe ya kindumba. Mpe Nge tubaka, kilumbu ntangu Nge ke tsyamuna. . . “Wanzio tsyamunaka mbungu ya yandi na zulu ya yawu, mpe—mpe menga ya konso mbangi kutalanaka na kati kuna.”

⁶ Mfumu, sadisa beto na kuzwa. . . na kuvwanda ya kutelama ntangu yayi, samu ti ntangu ke na kubelamaka. Mutindu beto ke mona kibulu yayi na mampoka zole kubasika na ntoto, na kati ya nene mpe bantu mingi ve, “Na mampoka mutindu mwana-dimeme, kasi yawu vwandaka zonza mutindu dalango.” Beto ke kwikila ti ngunga yango me belama ntangu yayi, Tata, na yina mabuundu yayi ke na kuvukanaka bawu mosi kintwadi, “Na kusalaka kizizi na kibulu”; mpe ya ke vwanda mpasi mingi na nkonga yina, Mfumu, bayina ke vukana ve. Kumanga yango ya kieleka ke kwiza, kasi na ngunga yina Nge silaka na kubaka Dibuundu ya Nge. Sadisa beto, Mfumu.

⁷ Ntete ditonzi mosi ya maza kubwaka, Noé vwandaka na kati ya nzasa. Ntete tiya kubula Sodome, Lot kwendaka. Tata, beto ke kwikila ti, kieleka ntete mangolo ya atomique kutsyamuna ntoto yayi na bitini-bitini, Dibuundu ke kwenda. Beto kele na kyese mingi, Mfumu. Mpe, beto zaba ti ba-bombe kele ya kulelika na bamwanza, na nkokila yayi.

⁸ Mpe beto lenda tala na Mazulu mpe kumona Mwana ya muntu kutelama na Kiti ya Yandi ya kintinu samu na kubanda na ntoto Enlevation ya Dibuundu ya Yandi, mpe beto zaba ti makulu ya Yandi ya ntalu ke simba ve ntoto yayi ya masumu na kilumbu yina; mutindu kaka Rebecca yina vwandaka nata kamela mpe kulumukaka na kamelo yango, kaka na kati-kati na yinzo ya Abraham, kuna na bilanga yandi kutanaka bakala ya yandi ya makwela. O Nzambi, mpe Dibuundu ke kutana Bakala ya yandi ya makwela na zulu, “Samu ti bayina kele moyo mpe bayina bikanaka ke kanga ve to ke kanga nzila ve na bayina kele ya kulala. Mpungi ya Nzambi ke wakana, bantu ya kufwa na Klisto ke vumbuka ntete, mpe beto ke zanguka kintwadi na bawu na kukutana Mfumu (na bilanga) na zulu, mpe kuvwanda ntangu nyonso na Yandi.”

⁹ Oh, sadisa beto, na nkokila yayi, Mfumu. Pesa beto lembami na bampeve ya beto, mpe baka kuyina nyonso mpe kukondwa kukipe na beto, mpe ti beto vwanda ya kusulumuka na Mpeve-Santu. Bika ti Wanzio ya Nzambi kutwadisa na nkokila yayi.

¹⁰ Mfumu, mu zaba ve yinki ya kutuba na bantu yayi. Ntangu yayi, mu kele na masolo mpe bima ya kusonika awa ya yina Nge salaka, kasi ya ke lomba Nge samu na kutendula bilumbu ya ntwala, na yawu mu ke sambila ti Nge ke pesa yawu na Nkumbu ya Yesu Klisto. Amen.

¹¹ Ntangu yayi awa beto baka Buku ya Apocalypse. Mpe beto kele na nkokila yayi na nsungi ya dibuundu ya. . . Nsungi ya dibuundu ya yiya, Thyatire, nsungi ya dibuundu ya nene ya

kuzabana mutindu Nsungi ya Mudidi. Nsungi ya dibuundu yayi kubandaka na mvula 606 mpe kuna sukaka na mvula 1520. Mu... Nyonso kaka mu lendaka kusala, vwandaka kutalisa. Bizabi mingi ke bakaka—ke bakaka Santu Patrick na kuvwanda mbwetete to... konso...

¹² *Bambwetete sambwadi* vwandaka “bawanzio sambwadi” ya Bansungi ya Dibuundu Sambwadi. Beto zaba mbasi na nkokila, kukondwa ntembe, Luther; mpe na manima Wesley. Beto zaba ve nani ke vwanda mbwetete ya dibuundu yayi ya Laodicée. Ya kele... Beto kele na nsungi yango ntangu yayi, katuka mvula 1906 na ntonono ya Pantekote. Kasi ya ke vwanda na wanzio ke telama yina ke zenga na ngolo nyonso ba-dogme, ke kubika Dibuundu samu na kukwenda na Yinzo. Ntangu yayi, mfumu mosi ya—ya... na Kimpeve, yina ke telama na bidimbu mpe mambu ya ngitukulu. Ntangu yayi, mu ke sambila ti Nzambi ke sadisa beto na kubakula yayi.

¹³ Na kutalaka yayi, kufyongonina, Santu Patrick vwandaka muntu ya nene. Mpe na kubakaka ndambu ya mikanda ya ntama, Santu Patrick vwandaka ve muntu ya Katolika. Yandi teleminaka dibuundu ya Katolika. Mpe na kati ya ntangu ya Kusungika, ti dogme yina vwandaka na bawu kuvutukaka, mpe ya ke talisa ti Santu Patrick teleminaka dibuundu ya Katolika. Ti... Santu Patrick vwandaka mingi mutindu muntu ya organisation, yandi vwandaka na lukolo ya yandi mosi. Yandi na ntete... ntangu ba bakaka yandi na simu ya mubu, yandi, mpe zole ya bampangi ya yandi ya bakento ya fyoti yina yandi kuwaka dyaka ve nsangu. Ba nataka bawu, kukondwa ntembe na Rome mpe ba tekaka bawu mutindu bampika. Yandi mpe ba nataka yandi mpe tekaka yandi mutindu mpika mpe ba pesaka yandi kisalu ya kukeba na bangulu.

¹⁴ Yandi vwanda yindula bayimbwa samu na kukeba—kukeba bangulu ya yandi, mpe nyonso yankaka; mpe bawu zolaka kuma na bandookolo ya kuswaswana mpe landila bima yina yandi vwandaka pesa bayimbwa. Mpe yina na nsuka vwandaka mutindu ya kukimina, na yisi ya maswa, ntangu bayimbwa bumbaka yandi tii yandi kumaka na mubu. Na manima ya mwa ntangu yandi kumaka na yinsi ya yandi ya luzolo, Irlande, mpe monanaka na mama mpe tata ya yandi yina vwandaka zinga dyaka. Mpe Santu Patrick vwandaka mwana-nkazi ya Santu Martin ya nene.

¹⁵ Yina, vwandaka mosi ya kulutila nene yina beto me kuzwaka ntete na nzila ya bantu katuka Yesu Klisto, ya vwandaka Santu Martin. Mabuundu ya yandi vwandaka nyonso ya kifuluka na Mpeve-Santu, bawu nyonso vwandaka zonza na bandinga, vwandaka na bidimbu mpe mambu ya ngitukulu, mpe bimangu, kaka mitindu nyonso ya bimangu vwandaka salama. Yandi bumbaka Lukwikilu ya pantekote na kati ya nsungi yango ya dibuundu yina kwelanaka na malongi ya Katolika,

bumpani mpe mutindu ya ba-Nicolaïte kukwelanaka kintwadi, na kusalaka organisation, mpe na kusalaka ba-Nicolaïte, yina beto ke bokilaka *Nikao*, yina zola kutuba “kununga, kununga, to kupindula,” misambidi, mpe kukatula Mpeve-Santu na dibuundu, mpe “kaka nganga-Nzambi kele ya santu, kaka muntu yina.” Beno me mona? Mpe kuna bawu ke zinga mutindu nyonso bawu ke zola, mu banza, mpe kaka ntangu nyonso yina beno ke funguna masumu na nganga-Nzambi. Kuna bawu . . .

¹⁶ Beto talaka mazono na nkokila, ti—ti ba tulaka bawu, ti Constantin tulaka bishop ya ntete, mpe tulaka yawu . . . pesaka bayinzo ya nene yayi na bawu, landila mutindu beto pesaka beno bilumbu mpe nyonso yina beno sonikaka. Mpe kuna bawu kuzwaka feti ya nene ya solstice kuna, yina vwandaka na kilumbu ya 21 ya Ngonda ya kumi na zole, kilumbu ya kulutula nkufi na mvula. Mpe bawu kotisaka kuna kinzambi-nzambi yayi, na kuvwandaka, ti Yandi vwandaka “kilumbu ya mwini.” Beno me mona, kilumbu ya mukembo ya mbutukulu ya mwini, bawu nataka mbutukulu ya Yesu Klisto na kukatukaka Ngonda ya yiya na Ngonda ya kumi na zole na kilumbu ya 25.

¹⁷ Kilumbu ya 25 ya Ngonda ya kumi na zole. Na kati ya bilumbu tanu yina vwandaka ntangu ba-Romain vwanda kuzwaka mikembo ya bawu ya nene, bansaka, mpe nyonso yankaka, mpe ya kele ntangu bawu vwanda kuzwa feti yayi ya nene ya mimpani. Mpe bawu tulaka muntu yayi mutindu nzambi yandi mosi kuna, mpe lwatisaka yandi mbote mpe nyonso. Mpe bawu vwandaka na nzambi ya bawu kaka na bawu. Mpe . . . ya kele ntangu bantu ya na manima ya millénium kotaka na luzingu, kaka kuna, samu ti bawu vwandaka banza ti dibuundu vwandaka na Millenium kaka kuna. Beno me mona, samu ti bawu vwandaka na bimvwama, vwandaka na nsatu ya kima ve, luyalu mpe dibuundu vwandaka nyonso kintwadi. “Millenium ke na kulandila,” ya kele dyaka malongi ya Katolika tii kilumbu yayi. Beno me mona? Ntangu yayi, “Millenium ke na kulandila,” samu ti beto zaba ti ya kele luvunu. Millenium: Nkwizulu ya Zole ya Klisto ke nata Millenium. Ya kele kieleka.

Ntoto ke vumuna, na kudilaka samu na
kilumbu yango ya luvulusu ya mbote,
Ntangu Mfumu ya beto ke vutuka dyaka na
ntoto.

¹⁸ Ntangu yayi, santu ya nene yayi awa vwandaka Colombo. Yandi vwandaka muntu ya nene ya Nzambi.

¹⁹ Ntangu yayi, mu kele na mutindu ya disolo ya yandi ya kusonika awa. Na ntete, nsungi ya dibuundu ya yiya, *Thyataire*, ya zola kutuba “mubebisi, ya pete-pete,” to, “dibungi.” Beno me mona? Ya vwandaka kaka ntangu ya makangu kubanda mvula 606 na mvula 1500.

²⁰ Mbwetete vwandaka Colomba, yina vwandaka ya Irlande na Ecosse, yina vwandaka mwana-nkazi ya Santu Martin; mpe zingaka pene ya bamvula makumi sambanu na manima ya Santu Patrick, mpe na yawu kisalu ya yandi kubandaka pene ya bamvula makumi sambanu na manima ya Santu Patrick. Ya yandi . . .

²¹ Yandi ata mbala mosi ve kundimaka malongi ya Rome. Yandi vwandaka muntu mosi ya nene ya lukwikilu. Yandi mangaka malongi ya Rome; yandi kwendaka ata mbala mosi ve na Rome, mpe yandi mangaka nyonso ya yawu. Ya kele ti, mu lendaka ve kumona kisika ba sonikaka kieleka nkumbu ya yandi. Mutindu ba salaka Santu Martin mpe bayankaka, ba sonikaka ve nkumbu ya yandi mpe ya Irénée samu ti ba vwandaka dyaka na kati ya Dibuundu yina vwandaka na bidimbu mpe mambu ya ngitukulu ya Pantekote, kasi vwandaka kwikila. Yandi ata mbala mosi ve kubakaka malongi ya Rome, malongi ya bawu. Yandi bakaka Biblia samu na malongi mutindu mama ya yandi ya kinzambi, mpangi-kento ya Santu Martin, mpe ata mbala mosi ve bakaka malongi ya Rome na ntangu mosi. Yandi vwandaka longi ti bidimbu ya Marc 16 zolaka landa konso mukwikidi. Amen! Mu . . . Ya kele mutindu ya muntu mu ke zolaka; yina ke kwikilaka. Yinga, tata.

²² Yandi—yandi kuwaka na makutu Ndinga ya Nzambi kubokila. Ya kele dyaka kidimbu ya mbote na yandi, beno me mona. Na yina kima ve zolaka kukanga yandi nzila na manima ya yawu, yandi kwendaka, uh-hum, uh-huh, yandi vwandaka na nzila ntangu yandi kuwaka na makutu Ndinga ya Nzambi.

²³ Kimangu mosi . . . Mu kele na mingi ya ku- . . . awa, kasi kana beto ke baka kaka yandi yayi. Kimangu mosi vwandaka ti ntangu yandi kwendaka na mbanza mosi yina Mfumu fidisaka yandi, mpe mbanza zolaka ve kuyamba yandi, na yawu bawu basikaka kuna mpe mekaka na . . . bakaka ba-musicien, mpe nyonso yankaka, mpe kangaka myelo mpe mekaka na kufuka ndinga ya yandi, na kusalaka ba-musicien kubula. Mpe yandi bandaka na kulonga, mpe ya fukaka bandinga ya ba-musicien mpe bamyelo zibukaka, yandi kotaka, longaka na mutindu nyonso. Yandi kuzwaka nkonga nyonso kundima.

²⁴ Awa kele dyaka mwa mosi mu ke zola kaka mutindu kuzonzila. Yandi kwendaka na mbanza mosi. Ba vwandaka na bambanza ya bawu bibaka ya ngolo na bilumbu yango, kieleka. Na yawu yandi kwendaka na mbanza, mpe ba basisaka yandi na ngaanda. Na yina yandi vwandaka kwenda, mwana ya bakala ya mfumu kubwaka kubela ya ngolo, mpe ba fidisaka kubokila santu yango ya mbote. Yandi vutukaka mpe lalaka yandi mosi na lweka ya mwana ya bakala yina vwandaka kufwa, mpe yandi vutukaka na luzingu.

²⁵ Dibuundu ya yandi vwandaka ya kufuluka na Mpeve-Santu, yandi vwandaka zola ve kima mosi ya fyoti, samu ti konso mambele ya dibuundu ya yandi zolaka vwanda na Mpeve-Santu. Mpe yandi teleminaka mpe yinaka na ngolo bukimfumu ya Rome. Mu ke kwikila ti yandi vwandaka mbwetete ya nsungi. Yinki yandi vwandaka sala? Na kuzonzaka na bandinga, mbotika na Nkumbu ya Mfumu Yesu, na kuvutulaka bima yango ya kieleka yina bawu kubandilaka. Kana Nzambi kele yina kele na nsuka ve, mpe ti ya kele mutindu Yandi tulaka Dibuundu ya Yandi na ntonono, ya fwana vwanda kaka mutindu mosi, mpe ya fwana vwanda (ata na lutangu ya fyoti) nzila nyonso; ya kunikama pene-pene *awa*, me vutuka dyaka na Luther.

²⁶ Ntangu yayi, beto zola kubanda ntangu yayi, mpe kumona kana beto lendaka manisa ndambu ya banzila yayi awa, na . . . beto ke banda na nzila ya 18:

. . . *na wanzio ya dibuundu ya Thyatire sonika; . . .*

²⁷ Beno me tala ba-adresse yayi—yayi? Bansangu kele ya kutuba na wanzio, to na mulongi yina ke nata Nsemo na nsungi ya dibuundu yango. Beno me mona? Ntangu yayi, mazono na nkokila beto talaka, na kukangaka nsungi ya dibuundu yankaka yayi ya—ya Pergame, ti wanzio ya dibuundu (na kunungaka nsungi ya dibuundu yayi) zolaka kuzwa ditadi. Mpe na ditadi yayi . . .

²⁸ Ntangu yayi, beto bakaka “ditadi” yango mpe fwanikisaka, ya zola kutuba “ditadi ya nene.” Yinki ya kele? Wanzio ke vwanda mosi mutindu Pierre, ya kubokila “ditadi.”

²⁹ Beto talaka ti nkumbu ya beno kele na lutumu na luzingu ya beno. Ntangu yayi, mu lenda kwenda ntama mingi ve na yawu, samu ti dyabulu kele na numérologie ya luvunu; beto zaba yawu; ke bandisa *ba-sentiment* ya bantu, mpe nyonso yankaka mutindu yina, yina ke kotisaka na malongi ya kuzonza na bampeve ya kufwa. Mpe malongi ya kuzonza na bampeve ya kufwa kele ya dyabulu. Beto zaba yawu. Mpe ya kele mutindu, beno fwana tala mbote. Mutindu bawu . . .

³⁰ Ya kele samu na yina bawu bokilaka Yesu “Béelzébul,” “dyabulu,” samu ti, beno me mona, Yandi lendaka na kumona mabanza ya dibanza ya bawu. Beno me mona, kasi Yandi vwandaka Ndinga ya Nzambi. Mpe Hébreux 4 ke tuba, “Ndinga ya Nzambi, kele meno kulutila mbele ya meno ya balweka zole, mpe kele mufundisi ya mabanza ya bansatu ya ntima, dibanza.” Beno me mona? Na yawu, Yandi vwandaka Ndinga, Yandi kele Ndinga ya moyo, mpe Ndinga ya moyo ke kotaka na beto mpe kuna Yawu ke salaka kusala mosi na beto. Beno me mona, mosi, samu ti Yawu kele Ndinga mosi. Beno me mona, Yawu kele kima mosi na kati ya beto. Mpe ya kele mutindu. Mpe bantangu yankaka bayina kele na nzila yina ve ke zonza na bandinga, mpe

mosi yankaka ke tendula yawu. Yinki ya kele? Ndinga me kuma dyaka nsuni na kati-kati ya beto.

³¹ Mpe kuna, beto talaka kuna ti wanzio yayi ke kuzwa... wanzio ya nsungi ya dibuundu yina kuzwaka “ditadi.” Ya vwandaka ditadi ya *mpembe*, yina zolaka kutuba ve ludedomo ya yandi mosi, kasi “ludedomo ya Yandi Nzambi.”

³² Mpe na kati ya ditadi yayi vwandaka na “nkumbu,” nkumbu yina muntu ve zabaka kasi yandi yina kuzwaka yawu yandi mosi. Yandi zabaka yawu, kasi muntu yankaka ve zolaka zaba yawu kasi yandi. Na yawu ntangu beno ke kuwa bantu yayi kusepedisa beno, na kutubaka ya bawu; ya kele “Jean,” ya kele “Paul,” ya kele “Marie,” ya kele “yayi,” “yina,” to “yankaka.” Beno kwikila yawu ve, samu ti kana ya vwandaka, yandi zolaka tuba ata kima mosi ve samu na yawu. Beno me mona? Ya kele kieleka. Yandi fwana bumba yawu samu na yandi mosi. Yandi zabaka. Muntu ve zabaka kasi yandi yandi mosi, kasi yandi zabaka samu ti konso kinungi ya kulunga kuzwaka nkumbu ya malu-malu na mutindu yina—yina—yina.

³³ Beno talaka ba vwanda bokilaka Abraham Abram, kasi ntangu Nzambi kwendaka na kusadila yandi, Yandi sobisaka nkumbu ya yandi na “Abraham.” S-a-r-a vwandaka Sara, kasi ntangu Nzambi zolaka kusadila yandi, Yandi sobisaka nkumbu ya yandi na S-a-r-a-i: na Sara, “mwana ya kento ya ntinu.” Beno zaba ti Jacob...? *Jacob* vwandaka “muntu yina ke bakaka kisika ya bampangi.” *Esau* zola kutuba “mbwaki,” ya kifuluka na nsuki mpe mbwaki; ya nsuki ya mbwaki, mpe nyonso nzutu, ya kele *Esau*. Ntangu yayi, mpe *Jacob* vwandaka “muntu yina ke bakaka kisika ya bampangi.” Mpe *muntu yina ke bakaka kisika ya bampangi* kele “muntu ya luvunu.” *Esau* tubaka ve, “Nkumbu ya nge kele ve ya kubokila *Jacob*, ‘muntu yina ke bakaka kisika ya bampangi?’” Kasi ntangu yandi nwanaka na Mfumu mpimpa nyonso, mpe nungaka, mpe ba sakumunaka yandi, Nzambi sobisaka nkumbu ya yandi; *Jacob* na *Israël*, “mwana ya ntinu ya bakala na Nzambi.” Paul vwandaka ya kubokila *Saul* tii yandi kutanaka Mpeve-Santu na mutindu ya Nsemu yina lezimaka na yisi na zulu ya yandi, ba sobisaka nkumbu ya yandi na Saul na “Paul.” Simon, ntangu yandi kutanaka Yesu, Yandi sobisaka nkumbu ya yandi na “Pierre.” Ti . . .

³⁴ Mpe ntangu Yesu nungaka, ba sobisaka Nkumbu ya Yandi. Mpe Yandi ke monikisa Nkumbu yango, “Yandi yina ke vwanda na Yandi, ke nunga mutindu Yandi kele, yandi kuzwaka nkumbu ya malu-malu; mpe Mu ke monikisa Nkumbu ya Munu ya malu-malu na yandi.” Beno me mona? Mpe konso kinungi, mu zola kutuba, na kati-kati ya mutindu yina: bantwadisi yango mpe nyonso yankaka. Ntangu yayi, bana nyonso ya *Israël* kuzwaka ve bankumbu ya bawu kusoba, kieleka. Ya kele kieleka. Kasi bantwadisi ya nene yayi, ntangu bawu vwandaka nunga, bawu

vwanda kuzwa nkumbu ya malu-malu. Beno me mona mutindu ya ke fwanakana? Kaka na mutindu ya kulunga.

³⁵ Mpe ntangu yayi beto talaka ti yandi mpe kuzwaka “mani ya kubumbama.” Ntangu yayi, mani ya kubumbama kele dimpa ya musiku. Dimpa ya musiku vwandaka kaka samu na banganga-Nzambi. Ya kele kieleka. Dimpa ya musiku vwandaka kaka samu na nganga-Nzambi. Mpe bawu . . . Ya vwandaka kima ya mutindu ve yina ba salaka samu na nganga-Nzambi, ya kele, bantwadisi; mpe muntu yayi kunungaka. Dibuundu ya movimba vwandaka na mani, kasi yandi vwandaka na ya *kubumbama* (ya mutindu ve) *mani*, to “*luzayikisu ya mutindu ve*,” oh, ya nani Yesu vwandaka, mpe yina me tala Yandi, nyonso me tala Yandi. Beno me mona, yandi kuzwaka luzayikisu yina kana yandi nungaka. Na wanzio, “Kangama, samu ti yandi yina . . .” Yandi nungaka. Ya kutuba na *wanzio* ya dibuundu. Beno me mona?

³⁶ Ntangu yayi beto ke tala kuna, na nkokila yayi, beto ke banda:

. . . na wanzio ya dibuundu ya Thyatire sonika; Bima yayi me tuba Mwana ya Nzambi, yina kele. . . meso mutindu. . . milaka ya tiya, mpe makulu ya yandi. . . mutindu kisengo;

³⁷ Ntangu yayi, ntangu beto monaka Yandi na ntete, na Nsungu ya Ephese, to na ntonono ya ntete ya Luzayikisu, beto monaka Yandi na bima sambwadi ya bumuntu ya Yandi ya nkembo. “Nsuki . . .” Beto monaka ti Jean talaka Yandi na kilumbu ya Mfumu.

³⁸ Ntangu Yandi ke kwiza awa, Yandi kele Nganga-Nzambi. Ntangu Yandi vwandaka awa na zulu ya ntoto, Yandi vwandaka Profete, Profete ya Nzambi. Ntangu yayi Yandi bakaka Menga ya Yandi Mosi mpe kwendaka na ntuala ya Tata, yina ke sala Yandi Nganga-Nzambi. Ntangu Yandi ke vutuka Yandi ke vwanda Ntinu. Profete, Nganga-Nzambi, mpe Ntinu. Yandi vwandaka Profete ya Nzambi, Yandi vwandaka ngononi. Yandi vwandaka Nganga-Nzambi ya Nzambi, Yandi vwandaka Mwana-dimeme. Ntangu Yandi ke vutuka, Yandi ke vwanda Nkosi, Ntinu, (dikanda ya Juda) na kuyala.

³⁹ Kasi na kati-kati ya kimalu ya Yandi ya Kingaka, ntangu kivinga ya santu me bikana, kuna beto ke tala Yandi ya kutelama kuna. Mpe Jean ke tuba ti yandi vwandaka na Kimpeve na “kilumbu ya Mfumu”; na kilumbu ya sambwadi ve, Lumingu ve, nyonso yina kele zimbani. Beto talaka yawu, fyongoninaka yawu na nzila ya Masonuku, ya vwandaka na kilumbu ya Mfumu. Yayi kele kilumbu ya muntu. Nkwizulu ya Mfumu ke vwanda kilumbu ya Yandi.

⁴⁰ Mpe beto talaka yandi na kilumbu ya Mfumu. Mpe, ntangu yandi monaka Mfumu, Yandi vwandaka na “nsuki ya mpembe

mutindu mvula ya mpembe.” Mpe beto zaba ti ya vwandaka monisa zuzi.

41 Kima yankaka, Yandi vwandaka ve Nganga-Nzambi kuna, samu ti Nganga-Nzambi vwandaka ya kukangaka na nsinga na luketo, ya zola kutuba *kisalu*. Kasi Yandi vwandaka ya kukanga nsinga na ntulu, na zulu *awa*, yina vwandaka zola kutuba ti Yandi vwandaka *Zuzi*. Amen! Mpe beto monaka Yandi kutambula na kati-kati ya minda sambwadi ya wolo.

42 Mpe ntangu yayi beto vutuka na “Kuluntu ya Bilumbu,” na kuvwandaka na nsuki ya *mpembe* na Kiti ya kintinu ya Mpeembe ya Lufundusu ntangu Daniel monaka Yandi, “Kwizaka na Kuluntu ya Bilumbu Yandi yina nsuki vwandaka mpembe mutindu mvula ya mpembe.”

43 Ntangu yayi, “mpembe.” Bazuzi ya ntama ya Angleterre na bamvula me luta, vwanda vwandaka, ntangu bawu vwanda bakaka kiti ya lufundusu bawu vwanda lwataka pelike ya nene ya mpembe, pelike ya mpembe mutindu mvula ya mpembe, samu ti bawu vwandaka bazuzi. Mpe Jean monaka Yandi na kilumbu ya Mfumu, ntangu Yandi vwandaka Zuzi. Amen!

44 Ntangu yayi beto monaka ti “Yandi vwandaka na meso mutindu milaka ya tiya.” Meso yango kuna mutindu milaka ya tiya. . . Mbala mosi meso yango vwandaka ya kufuka na masa ya meso ya bumuntu. Bawu zolaka telama mpe kudila samu na muntu ke na kufwaka, mpe na kuzabaka na baminuti tanu yina ke landa yandi zolaka zinga dyaka; kasi kaka kyadi ya bumuntu. Kasi na manima ya yina vwandaka na ngolo mosi yina ti Yandi lendaka kutala kaka na nzila ya luzingu ya muntu mpe kutuba na yandi nani yandi vwandaka mpe nyonso na yina me tala yawu. Samu ti ya vwandaka kwiza ntangu yayi na kubasikaka mutindu tiya. Meso yina lenda kutala na ntoto, mpe kumona nyonso yina ke salama. Wapi kisika beno ke telama na Kilumbu ya Lufundusu? Masumu ya beno ke vwanda pwelele na ntuala ya Yandi.

45 Mpe beno tala Yandi vwandaka, “Na ngaanda ya yinwa ya Yandi, mbele ya meno na balweka zole,” yina beto monaka vwandaka *Ndinga*.

46 Beto monaka makulu ya Yandi vwandaka “kisengo ya tiya,” mpe nyonso yina, yina zolaka kutuba “lufulu ya Yandi.” Yandi tambulaka na zulu ya kikamununu ya nganzi ya Nzambi ya Ngolo nyonso, mpe tambulaka ya kukangama mpe bakaka disumu na zulu ya Yandi, mpe basikaka, mpe sepedisaka Nzambi. Ya kele kieleka. Mpe lufulu ya Yandi kele lufulu ya beto:

Na zulu ya Klisto, Ditadi ya ngolo, mu me
telama, (tubaka Eddie Perronet,
Bantoto nyonso yankaka kele zyelo ke dyamisa.
(Ya kele kieleka.)

47 Ntangu yayi beto ke mona awa, ntangu nyonso yina ntangu Yandi ke sala na nsungi ya dibuundu mosi, Yandi ke talana na mutindu mosi ya Bankumbu ya Yandi ya Bunzambi. Ntangu yayi beto monaka na manima kuna, na nyonso ya ntete ya baluzayikisu keke Bunzambi (Bunene ya Bunzambi) ya Yesu Klisto: “Mu keke Yandi yina vwandaka, yina keke, mpe ke kwiza. Mu keke ya ntete, mpe ya nsuka, Nzambi ya Ngolo nyonso.” Beno me mona, luzayikisu ya ntete. Jean balukaka na kutala yina vwandaka zonzaka na yandi. Kima ya ntete, Yandi talanaka na yandi na . . .

48 Ntinu nyonso, ntangu yandi ke tuba, yandi—yandi—yandi ke tuba nani yandi keke; muntu nyonso. “Mu keke *Kingandi* na yina mu ke na kuzonzaka na beno, beno zaba munu ve. Mu keke William Branham, mu keke *John Doe*,” muntu nyonso yina ya keke.

49 Yandi tubaka, “Mu keke ya ntete mpe ya nsuka; Yandi yina vwandaka moyo mpe keke ya kufwa; mpe keke moyo mvula na mvula.” Oh, la la! Bunzambi. Awa beto ke mona Yandi na kati ya bima sambwadi ya bumuntu ya Yandi na kitezo ya Yandi ya nkembo. Na konso nsungi ya dibuundu Yandi—Yandi ke belama na bawu na mutindu mosi ya kuswaswana ya binzambi yango, mosi ya kuswaswana ya bitezo yango ya nkembo.

50 Ntangu yayi, na nkokila yayi, Yandi ke kwiza na mulaka ya tiya. Yandi ke na kutalaka na Laodicée . . . to na yisi na Thyatire. Yayi keke nsungi yina dibuundu keke ya kukwelanaka na mutindu ya Katolika mpe bumpani, to na mutindu ya ba-Nicolaïte mpe mimpani ya kuvukana kintwadi mpe salaka mpe butaka na dibuundu ya ntete, dibuundu ya kubongisa.

51 Mpe Nzambi tubaka ti *bisalu* ya ba-Nicolaïte (yina vwandaka na bantu ya Ephèse), na lweka ya mwa dibuundu ya Pergame kumaka “malongi,” mpe tubaka ya vwandaka “malongi ya Balaam.” Mpe Balaam vwandaka yandi yina tubaka na Israël na kukwenda kuna mpe kusala bindumba, to bawu salaka bindumba na Moab (yina vwandaka mambele ya dibuundu ya tiya ve madidi ve), to dibuundu ya ntangu nyonso, organisation ya nene. Mpe beto monaka ti Nzambi tubaka, ti malongi ya Nicolaïte yina vwandaka . . . bakaka . . . tulaka ngolo nyonso na dibuundu mpe tulaka yawu na lweka mpe salaka yawu organisation, Yandi tubaka, “Beno ke yinaka yawu, mpe Munu mpe ke yinaka yawu.” Yandi landilaka kaka na kutubaka, “Mu yina yawu! Mu yina yawu! Mu yina yawu!” Mpe ya kumaka na nene mingi *awa*. Beno ke mona mutindu dibuundu ke nikama, kaka *awa* tii kaka mwa kima ya fyoti, mpe ya keke dibuundu yina beto ke landila ntangu yayi.

52 Ntangu yayi, na kilumbu yayi yina luzayikisu yayi kwizaka, to vwandaka na dibuundu yayi, ya vwandaka kilumbu yina Rome vwanda tunga na zulu ya matadi ya nene ya kisika ya

bawu, madya ya bilumbu mpe matiti. Kasi Yandi ke na kutubaka na dibuundu yayi ti “Yandi kele dyaka milaka ya tiya yina ke talaka na yisi na nzila ya ntangu, mpe lufulu ya Yandi kele ve madya ya bibulu, bilanga ba me yonzika, kasi ya kele kisengo ya nene ya ngolo yina ba me teza na tiya ya ngolo.” Lufulu kele kieleka. Mu zola yawu. Beto zaba kisika beto kele ya kutelama.

53 Mbote mingi:

Mu zaba bisalu ya nge, mpe zola ya nge, mpe kisalu ya nge, mpe lukwikilu, mpe mvibudulu ya nge, mpe bisalu ya nge; mpe ya nsuka—ya nsuka kele ya kulutula na ya ntete.

54 Mbote mingi, dibuundu na kumona vwandaka pene nyonso ya kukatuka, vwanda kulumuka kaka, mpe bawu kwendaka ntama ya balukutakanu ya nene ya kimpeve, mpe bawu vwandaka yekama na zulu ya bisalu. Nzambi ke zolaka ve ti beto yekama na zulu ya bisalu.

55 Ya kele kidimbu ya organisation. “Beto ke tula na Ma Jones ndambu ya yinti. Mpe beto ke baka *Kingandi*, bana ya bawu, samu na bilele.” Mpe ya kele nyonso ya kulunga. Kasi, beno tala ve na yawu, beno sala yawu ve. Mpangi, yina—yina—yina kele bisalu ya mbote; muntu ya mbanza ya mbote, ke sala yawu. Kasi yina ya ke lomba na kuvwanda Muklisto kele kimbangi ya kubutuka dyaka, mbotika ya Mpeve-Santu. Mbote mingi.

56 Na kukulumukaka, bawu vwandaka sala bisalu na kisika ya zola mpe lukwikilu, na kuzwaka mingi mpe mingi ntangu nyonso na yina ya vwandaka landila.

57 Mbote mingi:

Mu zaba bisalu ya nge, . . . mu zaba lukwikilu ya nge, mu zaba mvibudulu ya nge, mpe nyonso yankaka . . .

58 Kasi ntangu yayi beto ke baka nzila ya 20, beno kuwa yayi:

Kasi mu kele na mwa bima na kutelemina nge, samu ti nge ke ndimaka kento yina Jézabel, yina ke bokilaka yandi mosi profetese, kulonga mpe . . . kuvuna bisadi ya munu mpe kusala bindumba, mpe na kudya bima yina ba pesaka munkayulu na biteki.

59 Ntangu yayi, “kento.” Yinki beto monaka *kento* vwandaka talisa mazono na nkokila? “dibuundu.” Ntangu yayi, awa, beto monaka awa ti ba vwandaka ya kubokila “ba-Nicolaïte,” “malongi ya Balaam,” mpe ntangu yayi ya me kuma na “Jézabel.”

60 Ntangu yayi, “Jézabel.” Kana beno tala, yayi kele disolo ya nene. Ntangu yayi, kana beno zola kusotika yawu, kubanda na Ntete ya Rois, pene . . . Ntete ya Rois, pene 16. Jézabel vwandaka ve mwana ya kento ya Abraham; to dyaka vwandaka nkonga yayi na lweka awa, Rome ya mumpani. Ba-Nicolaïte vwandaka nkonga mosi ya Miklisto yina vwandaka madidi, ya misiku

bayina kabukaka bawu mosi na Miklisto ya kieleka, “na kumona vwandaka na Lukwikilu ve.” Mpe bawu zolaka kusala dibuundu mutindu loge, mutindu mosi bawu kele bubu yayi; mutindu loge, ata fyoti ya Kimpeve na kati ya yawu; “Bilumbu ya bimangu me luta. Nyonso yina vwandaka samu na nsungi yankaka. Beto kele na bumpangi.” Franc-maçon ya mbote, muntu ya Odd Fellow ya mbote, to kima mosi ya mutindu yina ke basisa yawu. Mpe ya kele nyonso ya kulunga, kasi yina ke baka ata mbala mosi ve kisika ya mbutukulu ya malu-malu na Yesu Klisto, mpulusu ya moyo, Kieleka yayi.

⁶¹ Mbote mingi, Jézabel yayi. Ntangu yayi yandi vwandaka mwana ya kento ya Abraham, ya kele kieleka, mwana ya kento ya musambidi biteki. Na ntangu yina ntangu dibuta ya ntinu, dibuta ya yandi ya ntinu, vwandaka ya kuzabana na buyimbi ya kukwikama ya busafu na Baal. Tata ya yandi vwandaka nganganzambi ya kiteki ya A-s-t-a-r-t-é (Mu zaba ve mutindu beno ke tangunaka yawu, mu me baka kaka yawu na disolo). Achab bakaka nsalulu mutindu Constantin. Yinsi ya nene ya ngolo yayi vwanda vwanda pene-pene na Israél, na yawu kuna . . .

⁶² Yinki Constantin salaka mazono na nkokila? Yandi vwandaka ve ya kundima. Yandi vwandaka muntu ya politiki. Yinki yandi vwanda meka kusala? Yandi bakaka Miklisto, ntangu ba tubaka na yandi ti bawu ke sambila. . . (Mpe ntangu yayi kuna, beno bambuka moyo, yandi ke. . . beto ke na kuzonzilaka ntangu yayi na ba-Nicolaïte). Mpe yandi tubaka kana bawu ke sambila, mpe ti yandi ke nunga mvita yayi, kuna yandi ke—yandi ke vwanda Muklisto. Yandi kuzwaka ndosi. Yandi fikulaka na nkokila yina, kisengo ya yandi ya nkebolu nzutu, na kulunsi ya mpembe. Kisika ba-Chevalier ya Colombus kubutukaka, kaka na ntangu yina; ntangu yayi ya kele kisika bawu kuzwaka kutelama ya bawu. Kasi ata mbala mosi ti yandi salaka kima mutindu Muklisto! Na zulu ya mosi ya mabuundu ya ba-Nicolaïte yina ba vwandaka bokila Santu Sophie, yandi tulaka kulunsi. Mutindu mu tubaka mazono na nkokila, ya kele kima mosi kaka yina yandi kieleka salaka yina wakanaka kima mosi mutindu ti yandi vwandaka samu na dibuundu, landila mutindu mu lendaka baka na mosi ya ba-page ya masolo; mpe bizabi mingi yankaka ke tubaka kima mutindu mosi. Beto zaba kima mosi ve na yina me tadila kundima ya yandi, ntangu yayi. Kasi na kati ya yinki yandi kotaka? Kima yina yandi zolaka kusala, yandi monaka ndambu ya nene ya Rome, ntangu yayi.

⁶³ Ntangu yayi beno tala yayi, beno tala mbote nsalulu yayi. Mpe beno tala mbote mutindu Biblia ke siamisa yawu, Nzambi, bankama mpe bankama ya bamvula ntete ya salama. Mpe Constantin sadilaka mutindu mosi, Nzambi ke tuba awa, ti Achab sadilaka yawu.

⁶⁴ Ntangu yayi, Constantin monaka ndambu ya nene ya bantu ya yandi vwandaka ba-Nicolaïte yayi, Miklisto. Bayankaka ya

bawu vwandaka ya kubokila “ba-hérétique,” ya kele Pantekote; ba vwandaka “ba-hérétique mpe ba-exalté,” mpe nyonso yankaka. Ya kele kisika bidimbu ya beno mpe mambu ya ngitukulu kele. Kasi dibuundu ya *kimuntu* kuna vwandaka belama na organisation. Yinki yandi salaka? Constantin bulaka kitini ya mbote. Yandi kwendaka kuna mpe kuzwaka bankundi ya yandi ya mimpani, mpe kuzwaka bankundi ya yandi ya Miklisto, mpe vukisaka mabuundu kintwadi, tulaka... nataka bumpani na kati ya Buklisto. Buklisto mpe bumpani kukwelanaka na dibuundu ya Pergame.

⁶⁵ Ntangu yayi, yinki Yandi tubaka awa na yayi na nkokila yayi? Kima mosi mutindu Achab salaka. Achab, samu na kupesa ngolo na kimfumu ya yandi, kwelaka Jézabel, musambidi biteki ya kento yayi; samu na kupesa ngolo na kimfumu ya yandi, samu na kuzwa ngolo ya kulutila samu na Israël.

⁶⁶ Mpe ya kele yina mabuundu ke na kumekaka. Beno me mona kisika bawu ke na kumeka kusala Biblia, ke basisa yawu na mvula 1962? Ti ya kele Biblia yina ke sepelisa ba-Juif, ya ke sepelisa ba-Katolika, mpe ke sepelisa ba-Protestant. Oh, mpangi! Mu kele na kitini ya zulunale. Na munu na nkokila yayi mu kele na yawu ve, beno kuwaka munu kutanga yawu kilumbu yankaka yina. Beno bawu yayi, beno me mona.

⁶⁷ Oh, bima yayi samu na kumeka kubwela! Ba ke baka bima ya Nzambi ya santu mpe ke tsyamuna yawu mutindu nyonso, samu na kubwela mpe kusala lutangu ya mingi. Ya kele yina dibuundu salaka. Yandi ndimaka ti bantu kukota na yawu na lufulu ya kupesanaka mbote, mpe kuzwaka bimpumbulu mpe nyonso yankaka, bantu ya kukondwa kubutuka ya malu-malu. Kasi na kati ya Nzutu ya kieleka ya Klisto, yina kele ve organisation, kasi Nzutu ya mansweki—ya mansweki ya Klisto, beno lenda kati kaka kuna na yisi ya nzila mosi, mpe ya kele na nzila ya mbotika ya Mpeve-Santu. Kieleka! Mpe bidimbu mosi yina salamaka na bantumwa yayi, ke salama na Dibuundu. Ya kele kaka kieleka!

⁶⁸ Ntangu yayi, beto ke na nsatu ve kukakula mpe kutuba, “Mbote, beto ke kuma ya ba-Assemblée. Beto ke kuma ya ba-Unitaire. Beto ke kuma ya *yayi*, to ya ba-Baptiste, to ya ba-Methodiste.” Beto kumaka ya Klisto! Beno katukila bima yayi. Samu ti mosi na mosi ya ba-organisation yango kele nyonso mbote, kasi bawu—bawu ke kuzwaka malongi ya bawu mpe bima ya bawu, mpe beno fwana kwenda kumona kana mukengi ya nene ke bika beno kukota na yinsi yina mpe kuzwa lukutakanu. Kana beno longa ve mutindu kaka kieleka bawu ke salaka, kuna ba ke losa beno na ngaanda, beno lenda vwanda ve na Biblia. Nzambi lenda sala yawu ve, Yandi ke yinaka yawu. Muklisto nyonso yankaka ya kubutama dyaka ke sala mpe. Mingi ya bantu yango na ngaanda kuna kele kieleka . . . ke zola kusala, ke zola kusadila, mpe ke zola kubundana. Kasi beno lenda sala yawu ve, bawu ke losaka beno na ngaanda. Mbote, beno bika

bawu kulosa beno na ngaanda, beno kwenda na ntwala, beno kuzwa Mpeve-Santu na mutindu nyonso. Ya kele kaka kieleka. Kasi, beno me mona, bawu—bawu zola kuzwa dogme yango—yango. Bawu ke zola kunata beno kisika beno ke kuzwa mbongo mingi. Ba-Baptiste vwandaka na slogan mosi na mvula 1944, “Fuku mosi dyaka na mvula 1944.” Yinki bawu kuzwaka?

⁶⁹ Kaka mutindu évangéliste ya nene yayi Billy Graham tubaka, ntangu yandi vwandaka na Louisville, “Mu ke kwenda na mbanza mosi. . .” Yandi tubaka, “Santu Paul zolaka kwenda na mbanza mosi, yandi ke sala muntu mosi kundima; yandi ke vutuka mvula ke landa yandi ke—yandi ke kuzwa makumi tatu na zulu ya yandi yina; mitekolo-mitekolo-mitekolo-mitekolo-mitekolo-mitekolo, na zulu ya kundima ya mosi yina.” Yandi tubaka, “Mu ke kwenda na mbanza mosi, mu ke bokila makumi tatu ya mafunda, mu ke vutuka mvula ke landa, mpe mu ke lenda ve kutala makumi tatu.” Mpe yina yandi tubaka, yandi—yandi salaka kutuba ya mbote, kasi dyaka mu ke kwikila ve ti mpangi ya beto ya bakala ya ntalu vwandaka na kieleka. Yandi tubaka, “Beno milongi ya kulemba.” Yandi tubaka, “Mu ke pesa beno bankumbu ya bawu mpe banumelo ya balupangu ya bawu, beno ke vwanda na makulu ya beno na zulu ya mesa mpe ke sonikila bawu mukanda na kisika ya kukwenda, kuzonza na bawu.”

⁷⁰ Mu—mu zolaka yandi na mutindu mosi samu na yawu. Mu zola muntu kuvwanda yina yandi kele, muntu ya luvunu ve; beno telama kaka kuna mpe beno vwanda yina beno kele. Mpe mu ke zolaka yawu. Kasi mu ke zola kutuba, “Billy, nani vwandaka kuna samu na kubaka mundimi yina Paul kuzwaka? Yina ya vwandaka, Billy, kana nge lendaka kaka kubika bawu kuvutuka kuna mpe kupesa mbote, mpe kuvumbuka, mpe kutuba, ‘Yinga, mu me ndima Yesu mutindu Mvulusi ya munu mosi,’ mpe kubika yandi kuvwanda kuna tii yandi ke kufwa mpe ke bola, mpe me butama dyaka na Mpeve-Santu, yandi ke sala mindimi ya malu-malu.”

⁷¹ Mpangi, nge kele. . . yandi ke na kupelaka na tiya, beno lenda basisa yandi ve. Yandi kele mutindu yinzo na tiya na mupepe ya ngolo, beno lenda kaka kusala yawu ve. Oh, yandi ke mwangana bisika nyonso, mpangi, mundimi ya kieleka ya Klisto, yandi lenda vwanda swi ve. Yandi kele kaka. . . yandi ke kwenda na ntwala. Oh, mu kele na kyese mingi! Oh, la la! Mbotika ya Mpeve-Santu ya mutindu ya ntama yina ke vwandisaka moyo na tiya! Yandi lenda vwanda swi ve, mupepe ke bula beno, mupepe ya ngolo ke landila kaka na kufula beno. Samu mu ke na kulandila kaka na kudikisa yawu na bankuni, mpe ke landila kukwenda. Yinga, tata! Muntu ve zolaka baka mundimi ya Paul, Paul vwandaka nata bawu na kati mingi na kati ya Klisto tii yandi ke kufwa na yandi mosi, mpe ya moyo na kati ya Klisto, mpe Yandi vwandaka sala yankaka ya yawu. Ya kele kieleka! Beno tala yina ya kele.

⁷² Bankundi ya ba-Baptiste kele mbote. Kasi fuku mosi dyaka, wapi mbote ya ke sala? Beno fwana kuzwa fuku dyaka ya bankumbu. Mbote, beno vwanda kaka mpe kusonika bayankaka kana beno zola kusonika yawu kuna. Ya kele nyonso ya kulunga, kasi, mpangi, yina beto zola kele bankumbu na Buku ya Luzingu ya Mwana-dimeme, kufwaka na mbandukulu ya yinza, kusukulamaka na Menga, ya kufulukana na Mpeve-Santu, bidimbu mpe mambu ya ngitukulu kulanda beno.

⁷³ Beno fyongonina masolo. Mu ke zola ti beno nyonso kuzwa Ba-concil ya Nicée mpe kutanga bima yango, samu na kumona mutindu bambangi yango kusimbaka mulaka yango ya pantekote. Mu ke tuba na beno ntangu yayi, mpangi, beno ba-Baptiste, ba-Methodiste, mpe nyonso yina beno kele, nkuna ya Nsemo ya kieleka...ya kele ve organisation ya Pantekote, ntangu yayi; kasi Nsemo ya kieleka, kele Monosono ya Pantekote. Na yisi...Mu me vwanda bilumbu mpe bilumbu ntangu yayi, masolo yango, mu me timuna yawu nyonso mu lendaka kutala bisika nyonso, mpe ya kele mulaka yango ya pantekote yina vwandaka moyo katuka Pantekote na ntangu yayi. Yinga, tata! Ba mangaka yandi.

⁷⁴ Bayankaka ya bawu ke tubaka, “Mbote, dibuundu ya nene ya Katolika kwetisaka na mipepe ya ngolo. Mbote, ya ke talisa ti yandi kele Dibundu ya kieleka.” Mbote, ya kele ve kima mosi ya ngitukulu samu na munu, na luyalu mpe nyonso yankaka na manima ya yandi, yandi zolaka zinga kaka. Kasi yina kele—yina kele kima mosi ya ngitukulu, kele ti nkonga ya fyoti yayi yina ba losaka, lutangu ya fyoti yina, yina ba losaka na ngaanda, yina ba losaka na boloko, yina ba zengaka na bitini-bitini na scie. Wapi mutindu bawu salaka na kuzinga dyaka? Samu ti Mpeve ya Nzambi ya moyo vwandaka tambula na kati ya moyo ya bawu. Mpe bampeve nyonso ya difelo lenda telemina Yawu ve! “Na zulu ya ditadi yayi Mu ke tunga Dibundu ya Munu, mpe myelo ya difelo ke lenda ve kutelemina Yawu.” Beno tala kima ya kieleka. Ya kele yina ke pesaka Mpeve-Santu na milongi ya ba-Méthodiste yayi, mpe nyonso yina, awa. Beno me mona, ya ke sala bawu kutelama, ke sala kima mosi na beno. Ya ke kondwa ata mbala mosi ve.

⁷⁵ Achab, muntu ya luvunu yina. Beno me mona, yandi kwendaka, yandi tubaka, “Ntangu yayi, kana mu lendaka vwanda kaka na mutindu mbote ntangu yayi, mpe kuzwa yinsi ya nene yayi. Mpe kana mu kwela mwana ya kento ya kiboba ya bakala yina kuna, mbote, yina...beto—beto ke vwanda bankundi.” Yinki yandi vwandaka sala? Yandi vwanda teka bukuluntu ya yandi kaka.

⁷⁶ Ntangu yayi, ntangu dibuundu ya ba-Protestant yayi ke vutuka mpe ke vukana na dibuundu ya Katolika, ya ke sala kima mosi ya salaka na bilumbu ya ntama kuna. Achab zingaka na kilumbu yina...

⁷⁷ Ya me vwanda bambala tatu. Yandi vwandaka na kimbangi ya kati-kati ya mpimpa ya zyetolo ya Israël, mpe *awa* ya kumaka dyaka na kati-kati ya mpimpa, mpe beto me kuma dyaka na kati-kati ya mpimpa *awa*. Bansungi tatu na ntuala ya yayi; kotaka *awa, awa, mpe awa*.

⁷⁸ Ntangu yayi, kana beno ke tala, Achab kwelaka Jézabel samu na kupesa ngolo na bantu ya yandi. Ya kele kieleka yina Constantin salaka. Yandi salaka dibuundu ya nene mingi, mpe bakaka autel mpe salaka marbre ya nene, lwatisaka mbote muntu yayi, paapa, tulaka yandi na zulu kuna. Yandi vwandaka nzambi ya moyo, yandi zolaka zonza na bawu, mpe—mpe kutuba na bawu yina me tala masumu ya bawu, mpe yina sepelisaka kaka dibuundu yango ya ntama ya tiya ve madidi ve, mpe bawu kwendaka ntama. Kieleka! Kaka yawu! Mbote, kasi yina sepelisaka ve muntu yina vwandaka ya kubutuku dyaka, ntangu bawu bakaka yina mpe kuna kotisaka bankinzi ya mimpani na kutubaka bisambu. Yinki bawu salaka? Ba kulumusaka Jupiter, mpe tulaka Pierre. Ba kulumusaka Venus, mpe tulaka Marie. Mpe ya nataka—ya nataka bumpani na kati-kati ya Miklisto.

⁷⁹ Mpe ntangu Achab kukwelaka Jézabel, yandi salaka kima mosi kaka mosi. Yandi nataka kusambila ya biteki na Israël. Mpe yinki Jézabel salaka? Yandi kufwaka profete nyonso yina yandi zolaka kuzwa na maboko ya yandi. Ya kele kieleka? Mutindu mosi salaka ba-pape. Muklisto nyonso ya kieleka bawu zolaka kuzwa na maboko ya bawu, bawu kufwaka yandi.

⁸⁰ Kasi ya vwandaka na mbwetete ya nsungi yina, kiboba Elie! Oh, yinga, tata! Yandi vwandaka ve na boma, yandi tubilaka bawu na yawu. Yinga, tata! Yandi vwandaka mbwetete ya Nzambi ya nsungi *yina*. Ya kumaka kilumbu mosi yandi tubaka, “Mfumu, mu kele kaka yina me bikana.”

⁸¹ Nzambi tubaka, “Ntangu yayi, vingila fyoti, vingila fyoti, vingila fyoti, Elie.” Uh-huh. “Mu kele na bankama sambwadi ya kubumbana na kizunga, kuna. Beno me mona? Nge zaba ve kisika bawu kele. Ba kele na ngaanda kuna, ba-Pharisien, ba-Saducéen, ba-Baptiste, ba-Méthodiste mpe ba-Presbytérien, kasi Mu ke—Mu ke basisa bawu kuna, nge vingila kaka. Beno me mona? Mu kele na bawu na ngaanda kuna. Ya kele...ba kele—ba kele—ba kele ya Munu, mpe ba ke na kufukimina ve Baal tii awa.” Kasi kiboba Elie vwandaka Ndinga ya Nzambi na kilumbu yina. Yandi kieleka vwandaka kifwanukusu ya kieleka ya Ndinga ya Nzambi na nk wizulu ya ntete ya Klisto, mpe ya ke vwanda kifwanukusu ya Ndinga na nk wizulu dyaka ya zole ya Klisto, landila Masonuku.

⁸² Ntangu yayi, beto ke tala ti mwa Jézabel yayi, ntangu yandi kwendaka kuna, yandi zolaka kieleka kumwangisa ba-autel nyonso ya Nzambi mpe kusala ba-autel ya yandi mosi. Mpe yandi nataka bantu ya Israël kufukama na ntuala ya kiteki. Ya kele

kieleka yina Constantin salaka ntangu yandi salaka dibuundu ya Katolika. Yandi kotisaka bumpani na dibuundu ya Miklisto, mpe nataka Miklisto kufukimina biteki. Ya kele dyaka kieleka nsungi ya mudidi; nsungi ya mudidi ya Israël, nsungi ya mudidi ya—ya dibuunbu; na kufukimina biteki. Mpe Elie vwandaka mbwetete na kilumbu ya yandi.

⁸³ Mpe salaka Israël nyonso kusambila Baal, mpe mutindu mosi salaka dibuundu ya Katolika na Thyatire.

⁸⁴ Ntangu yayi, mu zola beno kutala kima yankaka kulezima awa, mu vwanda kuzwa disolo ya munu awa. Yesu ke tuba ti yandi vwandaka . . . kubokilaka yandi mosi profetese. “Kento yina Jézabel, yina ke bokilaka yandi mosi (ke bokilaka yandi mosi) profetese.” Ntangu yayi, beno me mona, dibuundu ya Katolika ke pesa ve muswa na bantu ya bawu na kutanga Biblia samu bawu ke tubaka ti nganga-Nzambi kele muntu yina kaka lenda na mutindu ya Nzambi kubakula Ndinga yango.

⁸⁵ Mbote, ya kele lutendulu ya kieleka ya profete. Profete kele na Lutendulu ya Nzambi samu na Ndinga ya Nzambi. Ya kele kaka kieleka. Wapi mutindu muntu lenda bokila mosi, muntu mosi, “profete” mpe dyaka kutuba, “ba kele na luzayikisu ya luvunu”? Ya kele kaka na sens mutindu bumwana ya Seko dyaka, beno me mona. Beno me mona? Beno me mona, ya kele—ya kele. . . *Profete* zola kutuba “nganga ya mbote, muntu yina Ndinga ya Mfumu ke kwizaka, luzayikisu ke kwizaka na yandi.” Mpova *profete* zola kutuba “nganga ya Ndinga ya Nzambi.” Yesu tubaka, “Kana ya kele na mosi na kati-kati ya beno yina kele ya kimpeve to profete, Munu Mfumu ke zonza na yandi. Mpe kana yina yandi ke tuba kusalama, kuna beno kuwa yandi, Mu kele na yandi. Kana ya salama ve, kuna beno kuwa yandi ve.” Kaka yina. Ya vwandaka—ya vwandaka Ndinga ya Nzambi ya Nzambi, mpe Ndinga ya Mfumu ke kwizaka na baprofete.

⁸⁶ Ntangu yayi, ba tubaka ti *dibuundu* yayi kuna vwandaka “profete.” Ntangu yayi, beno bambuka moyo, ya me soba na ba-Nicolaïte yayi ntangu yayi, ya me soba na “*yandi*.” Beno me mona yawu? “Jézabel.” Ntangu yayi, mazono na nkokila vwandaka “malongi ya Balaam.” Beno me mona, “malongi ya ba-Nicolaïte” mpe “malongi ya Balaam.”

⁸⁷ Ntangu yayi, Balaam vwandaka yandi yina salaka Israël ndumba. Mpe yinki ba-Nicolaïte salaka? Ba salaka organisation. Na yawu beno tula bawu zole kintwadi mpe beno ke kuzwa *yandi*, “dibuundu.” Kieleka! Apocalypse 17, “Ndumba ya nene ya kento yina kele ya kuvwanda na zulu ya bamaza mingi.” Kento, ndumba. Yinki yandi kele, to wapi mutindu yandi kele ndumba? Yandi ke na kusalaka bindumba, bindumba ya kimpeve, ke na kubalulaka Ndinga na bantu. Beno basika na bufanatike! Ya kele kieleka bufanatike. Ya kele kieleka.

⁸⁸ Ntangu yayi, beno me mona, yandi ke bokila yandi mosi profetese, “Kaka beto! Beto kele conseil! Beto kele dyaka kimvuka ya Laodicée, kimvuka ya bantu, mpe beto me zenga yayi, mpe yayi, mpe *mutindu yayi*. Na yawu beno kuwa beto!” Kasi. . .

⁸⁹ Ntwenya yina—yina ya nganga-Nzambi awa yufulaka munu na yina me tala Elizabeth Frazier, to na mwana ya kento Frazier. Yandi tubaka, “Cardinal zola kuzaba kana nge ke. . . to bishop, kana nge botikaka mwana ya kento yayi Frazier.” Yandi tubaka, “Yandi ke na kukumaka muntu ya Katolika.”

Mu tubaka, “Yinga, mu me kuwa yawu.”

Yandi tubaka, “Nge—nge botikaka yandi?”

Mu tubaka, “Yinga, tata.”

Yandi tubaka, “Wapi mutindu nge botikaka yandi?”

Mu tubaka, “Na mbotika ya Miklisto.” Uh-huh.

Yandi tubaka, “Mbote, yinki ke zola kutuba landila yawu?”

Mu tubaka, “Mbotika ya Miklisto, mutindu Biblia ke tuba. Ya kele kaka na mutindu mosi ya kubotika na mbotika ya Miklisto. Bantu nyonso na Biblia kukotaka na maza na Nkumbu ya ‘Yesu Klisto.’”

⁹⁰ Yandi sonikaka, bandaka na kusonika mutindu yina. Yandi tubaka, “Nge zaba, dibuundu ya Katolika vwanda salaka mutindu yina.”

Mu tubaka, “Na wapi ntangu?” Mu tubaka, “Mu kele na babuku ya masolo ya ntama awa yina mu lendaka kuzwa, na Londres mpe bisika yankaka.” Na yawu mu lenda longoka ntangu ngunga yayi ke belama bilumbu fyoti, ntangu kima mosi ke salama. Hmm. Mu tubaka, “Mu—mu zola kuzaba kisika.” Mu ke kwenda. . .

Yandi tubaka, “Oh,” yandi tubaka, “na Biblia.”

Mu tubaka, “Nge ke tuba ti. . .?”

Yandi tubaka, “Yesu bongisaka dibuundu ya Katolika.”

Mu tubaka, “Pierre vwandaka pape ya ntete, kuna?”

Yandi tubaka, “Na kutala kieleka.”

Mu tubaka, “Mu vwandaka banza ti ‘dibuundu vwanda ya kubwa ve mpe sobaka ve, mpe ti ba-messe nyonso nyonso zolaka vwanda ya kutuba na Latin samu ti ya soba ve.’”

Yandi tubaka, “Ya kele kieleka.”

⁹¹ Mu tubaka, “Mbote, beno kieleka salaka ndambu ya kusoba tuka ntangu yina.” Mu tubaka, “Kana Biblia yango kele buku ya Katolika, kuna mu kele muntu ya Katolika ya ntama.” Beno me mona? Ya kele kieleka. Mu tubaka, “Mu kele muntu ya Katolika ya ntama, na yina.” Mpe mu tubaka, “Kieleka ya vwandaka. . .”

Yandi tubaka, “Mbote, ntangu yayi, beno me mona, Biblia kele kaka disolo ya dibuundu ya Katolika.” Yandi tubaka, “Nzambi kele na kati ya dibuundu ya Yandi.”

Mu tubaka, “Nzambi kele na kati ya Ndinga ya Yandi.” Ya kele kieleka.

⁹² “Ti Ndinga ya Munu kuvwanda kieleka, mpe ndinga ya muntu nyonso yankaka luvunu.” Mpe awa na Buku ya Apocalypse ya kele Buku kaka (Ti munu vutukila yawu.) yina Yesu tulaka kinyemo ya Yandi. Mpe kima ya ntete Yandi salaka vwandaka kumonikisa Bunzambi ya Yandi, mpe na movimba Yandi salaka yawu. Mpe tubaka, “Muntu nyonso yina ke katula kima mosi na Yawu to ke bwela kima mosi na Yawu, mutindu mosi ba ke katula (kitini ya yandi) na Buku ya Luzingu. Ya kusakumuna kele yandi yina ke tanga, to yandi ke kuwa. Mpe ya kusinga kele yandi yina ke bwela kima mosi na Yawu to ke katula kima mosi na Yawu.” Beno bawu yayi, na yawu beno me mona lweka ya boma. Na yawu beno bwela ata mbala mosi ve kima mosi na Yawu; beno bika kaka Yawu mutindu Yawu kele, mpe beno landila kaka na kukwenda.

⁹³ Mpeve ke monikisa Yawu na beno kana beno ke vwanda kaka ya kulemvuka, beno lomba Yandi. Beno me mona? Ya kele kieleka. Ntangu yayi, na yawu Yawu kele mpati ve. Nzambi . . . Yesu vutulaka matondo na Tata samu . . . na kutubaka, “Mu me tonda Nge, Tata, samu ti Nge me bumba bima yayi na meso ya ba-rabbin, mpe na ba-bishop, mpe na ba-cardinal, na mikengi ya nene, mpe—mpe me monikisa Yawu na bana yina zola kulongoka.” Beno me mona?

⁹⁴ Ya kele yina beno zola. Ya kele luzayikisu ya Nzambi yina lenda kwiza kaka mutindu Yandi tubaka kuna, “Nani bantu ke tuba Mu kele?”

Yandi tubaka, “Nge kele Klisto, Mwana ya Nzambi ya Moyo.”

⁹⁵ Yandi tubaka, “Simon, nge longokaka yawu ata mbala mosi ve na seminere. Beno me mona? Muntu ve me tubaka yawu ntete na nge. Yina ke kwiza, ya vwandaka luzayikisu ya Mazulu. Mpe na zulu ya ditadi yayi Mu ke tunga Dibuundu ya Munu, mpe myelo ya difelo ke telemina Yawu ve.”

⁹⁶ Ya kele kieleka luzayikisu yina Abel kuzwaka na mbandukulu. Ya kele luzayikisu; ya vwandaka kuna, ya kele syaka luzayikisu, mpe ya ke vwanda ntangu nyonso luzayikisu. Ya kele kieleka.

⁹⁷ Ntangu yayi, beto talaka awa ti yandi vwandaka kento ntangu yayi, mpe *kento* ke monisa “dibuundu.” (Ya kele kieleka? Klisto ke na kwiza samu na yinki? Kento ya makwela, kento, mwense ya kusala kindumba ve.) Mpe kento ya ntama yayi awa, yandi ke tubaka yandi mosi kele Dibuundu ya Nzambi; kasi, yinki yandi vwandaka, yandi vwandaka ya kubongisa na

bimvwama mpe misanga, mpe nyonso, mpe yandi vwandaka na mbungu ya busafu ya bindumba ya yandi, ti yandi salaka bantinu nyonso ya ntoto kukola na vinu ya yandi. Ya kele kieleka?

⁹⁸ Ntangu yayi, beto ke tala yandi awa ti yandi kele ya kubokila “Jézabel.” Mpe Jézabel, yimbi yina Jézabel salaka, ntangu kaka yandi kuzwaka lutumu na kati-kati ya bantu yayi ya Israël, yandi kufwaka bawu mpe salaka nyonso yandi zolaka, mpe—mpe tungisaka ba-autel ya yandi mosi. Ya kele kieleka? Ya kele kieleka yina dibuundu ya Katolika salaka. Ya kele kieleka. Kasi ntangu yayi ti beto tanga kaka mwa ntama. Yayi ke sala beno kudasuka. Bantangu yankaka beno ke dasuka, beno ke kudya mwa mingi.

. . . ke bokilaka yandi mosi profetese, (Ntangu yayi, kana yandi ke tubaka, “Kaka munu kele mutendudi ya Ndinga.”) mpe ke kulongaka mpe kuvuna bisadi ya munu na kusala bindumba, . . . kudya bima yina ba pesaka munkayulu na biteki.

⁹⁹ Mpangi ya bakala yina yufulaka na yina me tala “nyoka,” na yina me tala “kudya ya mbuma na nsaba ya Eden.” Beno me mona yina ya kele (Mutindu yina ve?) ntangu Yandi tubaka, “kudya,” awa. Yina ya vwandaka, vwandaka ya kimpeve, beno me mona. Mpe . . . mpe . . .

Mpe mu pesaka yandi ntangu samu na kufunguna masumu ya kindumba—ya kindumba ya yandi; mpe yandi balulaka ntima.

Tala. Mu ke losa yandi na mbeto, (Wapi mutindu ya mbeto? Ya yinza. Ya kele kieleka yina yandi kele bubu yayi.) mpe bawu yina salaka pité na yandi na mpasi yayi nene, kana ti bawu balulaka ntima ya bisalu ya bawu. (Ya ke na kota na Lukwamusu ya Nene.)

Mpe . . . ke kufwa bana ya yandi na lufwa; . . .

¹⁰⁰ Ho! Ya yandi yinki? Mwana ya kento yayi ya ntama vwandaka na mwa bana. Ntangu yayi Apocalypse 17. Bantu yikwa ya beno . . .? Beno nyonso vwandaka awa mazono na nkokila, mu banza. Mbote mingi. Apocalypse 17, kento ya ndumba ya ntama yayi, dibuundu ya Katolika, vwandaka ya kubokila “ndumba,” mpe yandi vwandaka “mama ya bakento ya kindumba.” Ya zolaka vwanda bana ya babakala ve, ba vwandaka *mabuundu*.

¹⁰¹ Ntangu yayi wapi kisika dibuundu ya Luther, wapi kisika bayayi nyonso katukaka? Wapi kisika organisation nyonso katukaka? Wapi kisika kele ntonono ya yawu, Loadicée? Na nsuka ba-Nicolaïte kukotaka na yawu; ya kele kieleka kima mosi dyaka. Beno lenda sadisa yawu ve, mpangi. Oh, Elie bokaka na kuteleinaka kima yango na kilumbu ya yandi. Jean bokaka na kuteleinaka yawu na kilumbu ya yandi. Yinga, tata! Beno

banza ve kutuba na beno mosi, “Beto kele na Abraham tata ya beto: samu ti Mu ke tuba Nzambi kele na lenda na matadi yayi kutelemisa bana na Abraham.” Beno me mona? Ba lenda kaka kusadisa yawu ve.

¹⁰² Ntangu yayi, yandi vwandaka na bana. Jézabel ya kieleka vwandaka na bana? Inga, tata! Beno kuwa:

. . . Mu ke kufwa bana ya yandi. . .

¹⁰³ Yinki? Dibuundu ya Katolika, bana ya yandi kele dénomination ya ba-Protestant. Beno me mona, ya kele kieleka, samu ti bawu ke na kusalaka kima mosi. Ya kubotama kaka na yandi na mbotika ya bawu ya kubaluka, mbotika na ngaanda ya masonuku; kupesana mbote samu na Mpeve-Santu; “Tata, Mwana, mpe Mpeve-Santu” na kisika ya “Yesu Klisto.” Mpe ke sala kaka nyonso na mutindu ya kuswaswana na Biblia. Dyaka! Mpe bawu ke na kukota kaka na yawu.

¹⁰⁴ Mwana ya yandi ya kento vwandaka ya kubokila Athalie, A-t-h-a-l-i-e. Yandi kuzwaka yandi. . . Yandi, Jézabel, salaka Athalie kukwelana na Joram, mwana ya bakala ya ntinu ya Juda, mpe ntangu ba-autel ya Baal vwandaka ya kutelama na Jérusalem. Ntangu yayi, beno ke na nsatu ya kukwenda na disolo ve samu na yawu, ya kele Biblia. Beno me mona? Mwana ya yandi ya kento, Athalie, kwelaka mwana ya bakala ya Josaphat, yina vwandaka Joram. Mpe bana ya yandi ya bakento salaka kima mosi yandi salaka.

¹⁰⁵ Oh, la la! Beno lenda ve kumona yawu? Beno me mona mutindu ba-organisation yango me sala, bankundi? Bawu me vutuka kaka na nzila ya Luther mpe bayankaka, kaka kieleka, mpe bongisaka bawu mosi kintwadi na kisika ya kubika Mpeve-Santu. Mpe Pantekote salaka kieleka kima mosi. Ba zolaka ve kubika kaka Mpeve-Santu kukwenda na ntwala mpe kuzwa nzila ya Yandi, mpe kukwenda na ntwala; mpe konso nsemo ke kwiza, kufyongonina kaka yawu na nzila ya Ndinga, mpe kukwenda na ntwala. Bawu zolaka ve kubika Mpeve-Santu kutwadisa, ba zolaka sala organisation mpe bawu kukabukaka na nyonso yankaka yina zolaka talana. Bawu vutukaka kaka mbala mosi mpe kwelanaka na kima yango dyaka! Kaka kieleka. Ntangu beto ke baka nsangu yango, beno tala kaka mbote yina ke vingila beno na nzila awa. Beno me mona? Kwelanaka kaka dyaka kuna! Yesu tubaka awa, “Ya yandi. . . Jézabel yayi, yandi ke bokila yandi mosi ‘profetese,’ mpe Mu ke losa yandi na mbeto ya yinza, mpe ke kufwa bana ya yandi mpe” (Ntangu yayi, wapi mutindu. . .?) “na lufwa.”

¹⁰⁶ Yinki kele. . . wapi mutindu ya lufwa bana ya yandi ke kufwa? Beno me mona bawu kele ya kufwa ntangu yayi! Lufwa ya kimpeve! Ba kele na ata luzayikisu! Ba zaba organisation ya bawu, ba zaba katekisima ya bawu, ba zaba malongi ya bawu ya dibuundu; kasi ntangu ya ke kuma na kuzaba Nzambi,

bayankaka ya bawu zaba kima ve na zulu ya Yawu kulutula Hottentot ke zaba na mpimpa ya Egypte; ya kele kieleka, ntangu ya ke kuma na kuzaba kieleka Mpeve-Santu. Mu ke kumiyufula; bawu ke bokila Yawu...ke zola kubokila Mpeve ya Nzambi “nganga-ngombe,” to “dyabulu,” ya...na kumonaka bampeve, mpe bima ya mutindu yina, mpe kubasisa bampeve ya yimbi. “Mbote, yandi kele ve ya organisation ya beto. Nkonga ya bantu yina, oh, *brrrr*.” Beno me mona, bawu zaba kaka ve. Mpe kuna ke tula Yawu kidimbu na nkumbu ya “Kaka Yesu,” to mutindu mosi ya “exalté,” to—to mosi ya mutindu mutindu yina. Kuzaba kaka ve!

¹⁰⁷ Mpe ngunga ke na kubelama kaka ntangu kima yango ke vwanda ya kotalana. Ya kele kieleka. Nzambi ke sala yawu kieleka mutindu kaka mu kele ya kutelama na manima ya chaire yayi, samu ti Yandi ke basisa na ngolo bana ya Yandi kieleka mutindu mu kele ya kutelama kaka awa. Nzambi na Mazulu zaba yawu. Beno ke kwikila munu na kuvwanda profete ya Mfumu, kisadi ya Mfumu, beno kuwa munu. Yandi me belama mingi. Yinga, tata.

¹⁰⁸ “Bana ya yandi ke kufwa na lufwa ya kimpeve.” Beno tala bawu: ya madidi mpe ya kukangama na misiku. Beno tala na... beno tala ya beto...Beto ke na nsatu ya kuzonzila ve ba-Baptiste mpe ba-Presbytérien, beto zaba ti bawu kele ya kufwa ya me kuma bamvula. Yinki...

¹⁰⁹ Ntangu Luther kuzwaka réveil ya yandi, kunungisama, kana yandi zolaka...Kana yandi zolaka landila, kunikisa ya Pantekote ya nene yayi—yayi ntangu yayi zolaka vwanda dibuundu ya Luther. Nsemo zolaka kwiza na nzila ya kusantisama, mutindu Wesley landaka na kukota. Yandi... Luther zolaka landa yawu ve. Ve, tata, bawu kele yimeni ba-Luthérien.

¹¹⁰ Na yawu kuna Wesley kwizaka. Na manima Wesley kufwaka, kuna yinki salamaka? Ba bongisaka yawu, mpe bawu salaka ba-Méthodiste Wesleyen, ya Ntete ya ba-Wes-...oh, mitundu mingi ya ba-Méthodiste. Beno me mona? Mpe ntangu...Bawu kuzwaka réveil ya nene, kasi ntangu bawu losamaka na kati ya organisation, yinki salamaka ntangu Pantekote kwizaka na kuzonza ya bandinga mpe kuvutuka ya makabu? Bawu lendaka ve kulanda; ba bokilaka yawu bampeve ya yimbi.

¹¹¹ Ntangu yayi yinki Pantekote salaka? Kima mosi bawu salaka! Mpe wapi kisika bawu kele? Kaka ya kufwa mutindu ya kufwa mbote. Yinga, tata! Ya kele kieleka. “Mu ke losa bana ya yandi na mbeto ya—na mbeto ya lufwa, mpe kufwa bawu.” Mbote, bika—bika mu tanga yawu samu ti beno kumona awa, mu banza ya vwandaka nzila ya 22:

Mpe mu ke losa yandi na mbeto, mpe bawu yina salaka pité na yandi na mpasi yayi ya nene, (Lukwamusu ya Nene) . . .

112 Ya kele yina ke na kusalamaka. Ntangu yayi beno bambuka moyo, beno bika munu kusutope awa kaka minuti, Lukwamusu ya Nene yango kele samu na bayina—bayina ba ke losa na kati kuna, ya kele bantu yango yina kele bamwense ya kulala bayina kuzwaka ve mafuta na minda ya bawu; kasi bawu vwandaka ya organisation, bantu ya mbote, bayina vwanda kwendaka na dibuundu, nyonso; kasi ntangu bawu kwendaka samu na mafuta, kasi kuna ntangu lutaka. Beno me mona, losaka yandi na Lukwamusu ya Nene, yandi ke kota kuna, dibuundu ya Katolika ke kota kuna, bana ya yandi nyonso ke kota kuna na yandi, na Lukwamusu ya Nene.

. . . kana ti bawu balula ntima ya bisalu ya bawu.

113 Ya kele ve—ya kele ve bana yina kele na kati kuna; kasi dibuundu yawu mosi, ya kele bana ya yandi (ya kele organisation), ya kele ve bantu yina kele na kati kuna, mutindu bantu ya mawa ya Katolika, ya ba-Baptiste, ya ba-Presbytérien, to ya Pantekote. Mu ke tala kyadi samu na bawu. Kaka, “Mbote, mu . . .”

“Nge kele Muklisto?”

“Mbote, mu kele Presbytérien.” Oh!

114 Yina kele mingi ve ya kusala na Yawu kulutila na kutuba, “ngulu na kiti ya mpunda na zulu kele mpunda ya nsaka ya mbangu.” Na yawu yinki na yinza beno lenda sala samu na yawu? Mbote, kima mosi ve. Mu ke zonga yawu ve samu na kusakana, ya kele . . . yayi kele ata . . . kele ve kisika ya kusakana, yayi kele—yayi kele Nsangu ya mbote. Beno me mona? Mu vwanda zola kaka kupesa kifwanukusu. Beno me mona, ya—ya kele kieleka. Beno me mona, Ba kele dyaka ve—ve na kima mosi ya kusala na Yawu.

“Mu kele muntu ya Pantekote.”

115 Yina kele dyaka ve na kima mosi ya kusala na Yawu. Beno lendaka vwanda na lutangu mingi ya ba-organisation ya bawu, kasi beno kele mwana ya Nzambi yina me butama dyaka? Kieleka, beno ke zolaka bantu nyonso na ntima ya beno nyonso, na moyo ya beno, mpe beno zola Nzambi, mpe beno konso kilumbu . . . ata nyonso yina muntu ke sala beno? Kana beno ke telama mpe ke tuba, “Humm!” mutindu scie, ya ke talisa kaka Mpeve-Santu kwendaka, kana kieleka beno vwandaka na Yawu.

116 Beno tala:

. . . kana ti yandi balula ntima yango ya bisalu.

Mpe mu ke kufwa bana ya yandi na lufwa; . . .

117 “Bana ya yandi,” ya Jézabel. Ntangu yayi, yinki Jézabel salaka? Kwelisaka mwana ya yandi ya kento na nkonga yankaka yina (ya Juda) na lweka kuna, kuna na Juda. Ntangu yayi beno tala mbote nsalulu ya kimpeve. Mu banza ti mu lendaka bangula yawu samu na beno. Awa, beno tala yayi mbote-mbote ntangu yayi:

118 *Awa kele* Jézabel, mpe Israël. Kasi *awa* kele Juda, muntu yakaka na lweka awa, mosi yankaka; yayi kele Josaphat na lweka *awa*. Mbote mingi. Ntangu yayi, yayi *awa* vwandaka Achab; ntangu yayi awa kele Jézabel kaka na kati *awa*. Ntangu yayi, yandi me kwiza *awa* mpe me salaka Israël nyonso kukota na kusambila biteki.

119 Ya kele kieleka yina dibuundu ya Katolika salaka ntama na bilumbu ya yandi ntangu Constantin vukisaka ba-Nicolaïte (baya madidi ya misiku na kati *awa*) na kati—na dibuundu mpe na bumpani, mpe salaka mutindu ya bumpani ya Buklisto. Mu zola ve kunyongisa beno, bantu ya Katolika, kasi mu kele na kizutu na ntwala ya Nzambi. Yina kele nyonso dibuundu ya Katolika kele, kele mutindu ya bumpani ya Buklisto: balukwikilu ya luvunu, mpe biteki, mpe nyonso yankaka. Ya kele kaka kieleka, kaka mutindu ya bumpani. Ntangu yayi, ya kele kieleka. Kana mu ke na kufwa na minuti yayi, ya kele kieleka. Mpe ba-Protestant na kati ya kima mosi kaka, kaka na kitezo yankaka.

120 Ntangu yayi beno tala mbote yina Jézabel salaka. Kuna, beno me mona, dyabulu. . . Yandi vwandaka mingi ya kupesama, yandi bakaka bana ya yandi ya bakento. Yandi vwandaka na mwana ya kento yina butukaka *awa*, mpe mwana ya kento yayi kwendaka na lweka *awa* na muntu yayi ya nene ya santu mpe bakaka mpe kwelanaka na mwana ya yandi ya bakala; mpe nataka kima mutindu mosi na kati *awa* yina katukaka Josaphat, tii na lweka yayi.

121 Ntangu yayi, ba-Nicolaïte ya kieleka, ba-Nicolaïte, baya madidi ya misiku yina vwandaka zola organisation, ba kwelanaka na yawu *awa*. Mpe ntangu yayi beno tala kima mutindu mosi. Bawu bakaka Jézabel *awa* (dibuundu ya Katolika), mpe na yisi *awa* yandi bakaka mwana ya yandi ya kento (ba-organisation ya yandi) mpe kwelisaka yandi kaka na bawu na yisi kuna, mpe salaka kima mosi na bawu. “Ke kufwa bana ya yandi na lufwa,” lufwa ya kimpeve. Bawu bongisa bawu mosi na lufwa, mpe kima ya ntete beno zaba, Mpeve nyonso kwendaka.

122 Beno tuba na munu. Beno bika kaka ti mu yufula beno kima mosi, muntu nyonso ya disolo awa, yina mu zaba ya kele na tanu to sambanu ya beno ya kuvwanda awa. Mu ke zola beno kukwiza mpe kubasisa munu Disonuku mosi to—to kisonama ya—ya disolo, ti mosi ya mabuundu yango yina

kubwaka ntete mpe bayina kotaka kieleka na organisation kuvumbukaka dyaka na réveil. Beno tuba na munu. Ntangu bawu kubongisaka bawu mosi, bawu kuzwaka dyaka réveil na manima bawu kubongisaka? Ve, tata! Mpeve bikaka bawu. Mu me kotisa mpe Pantekote.

123 Ntangu Balusakumunu ya Pantekote kubwaka, mpe beno nyonso kuzonzaka na bandinga, beno bantu ya ntama, beno kuzwaka Balusakumunu yango ya nene ya Pantekote mpe nyonso, ntangu ya kubwaka. Na manima ya ntangu fyoti beno kuzwaka yina beno ke bokila Concil ya Nene. Organisme mbote mingi, kasi organisation ve. Kima ya ntete beno zaba, beno lendaka yawu ve, beno zolaka kaka kuvutuka mpe kukuma “mwana ya . . . Satana,” mpe bongisaka beno mosi.

124 Mpe na manima Nsemo yankaka kwizaka, na zulu ya Nkumbu ya Yesu Klisto. Kuna bawu kumaka nyonso ya kukangama, mpe tubaka, “Lusakumunu na Nzambi, kana beno kele na nkumbu ya Yesu ve, beno ke kwenda na difelo. Mpe beto kele na Yawu, mpe beno kele ve na Yawu.” Yinki bawu vwandaka sala? Bawu kufwaka kaka kuna na banzila ya bawu; bawu salaka organisation na yawu. Beno me mona? Na kisika ya kubika Nsemo kumwangana kaka na dibuundu, ya zolaka mbala mosi kubaka kisika ya yawu. Kasi beno bongisaka beno mosi. Yinki ya kele? Mwana ya Jézabel. Mpe bawu nyonso kufwaka, kintwadi.

125 Ntangu yayi mu zola kuyufula beno kima mosi. Ba-Assemblée de Dieu, to ba-Unitaire, to—to mosi yankaka ya bawu kieleka vumbukaka na réveil ya nene ya kuvukisa? Ata fyoti ve! Réveil ya nsuka yayi kaka kulutaka, ti Mpeve-Santu kulumukaka na nzadi (mingi ya beno ya kuvwanda kaka awa ntangu yayi) na mvula 1933, mpe lukutakanu yayi ya nene ya kubeluka zolaka salama, tubaka, “Yawu ke mwangana na yinza,” mpe ata mbala mosi ve ti ya basikaka fyoti na mosi yankaka ya ba-organisation. Nzambi basikaka na bisika yina mpe telemisaka mumpani mosi, pene-pene, na kubanda réveil yango. Mpe beno tala yina Yawu salaka! Beno me mona?

126 Ba-organisation yango, ntangu kaka bawu ke bongisa, bawu me kufwa. Yandi tubaka, “Mu ke kufwa bana ya yandi na lufwa.” Oh, la la! Mu zaba ti beno . . . Lemvo beno tala munu yimbi ve, kasi mu . . . Kana mu zaba Yayi mpe kutuba Yawu ve, mu kele muntu ya luvunu ya nsoni, mpe Nzambi ke tula kizitu ya Yawu na zulu ya munu. Mu ke zola kuvwanda mutindu Paul, “Na kukima ve kutuba malongi nyonso ya Nzambi.” Ya kele kieleka. Mbote mingi. Mbote mingi.

127 Ntangu yayi, mpe bawu tungaka ba-autel na Jérusalem. Ntangu yayi mu zola kumona . . . Mpe ntangu Jézabel kwelaka Achab, yandi nataka bizizi samu Israël kufukimina. Mutindu mosi salaka malongi ya ba-Nicolaïte, na kukwelanaka na

bumpani; bawu katulaka Jupiter, tulaka Pierre; mpe Venus, na Marie; mpe mutindu Biblia ke tuba, “Yandi salaka Israël kusumuka.”

¹²⁸ Mutindu mosi dibuundu ya Katolika salaka bana ya bakento nyonso na kukwelana na organisation, mpe kima ya muvimba kusumukaka, mutindu Jézabel na mwana ya yandi ya kento. Mbote mingi. Mpe na kusalaka yayi ntangu ba tulaka bukimfumu, mpe Pape Boniface—Boniface ya III kubakaka kiti ya yandi, mpe bawu kuzwaka nzambi mosi—mosi na zulu ya kiti ya kintinu, bawu kuzwaka dyaka ve nsatu ya mbotika ya Mpeve-Santu na kati ya dibuundu. Ya kele kieleka. Ba vwandaka na bacredo ya bawu mpe misiku, mpe landilaka.

¹²⁹ Mpe ntangu organisation kundimaka dogme mosi yayi, bawu sukisaka kimpwanza ya Mpeve-Santu na dibuundu, ba-Baptiste, ba-Presbytérien, ba-Méthodiste, mpe nyonso yankaka. Kieleka bawu salaka! Mpe malembe-malembe beto ke mona bawu kuyuma mpe kufwa mutindu Yesu tubaka na vinu. Ntangu yayi, Mpeve-Santu nyonso na kati ya bidimbu mpe mambu ya ngitukulu vwandaka ya kutula na manima na kilumbu lutaka. Mpe bawu kumaka na bimvwama, mutindu yandi salaka. Na yawu yandi salaka yinza nyonso ya muvimba na kusumuka, samu ti yandi kwendaka na yinsi nyonso, yandi mpe bana ya yandi ya bakento. Ya kele kieleka.

¹³⁰ Ntangu yayi beno tala mbote Yandi kubokila yandi na nsungi yankaka ya dibuundu ntangu yayi. Beno tala Yandi kubokila yandi. Beno tala Yandi mbote kunwanila awa na nsuka, mpe kubasisa bayina ya Yandi yina Bikanaka, “samu na luzolo ya Misolami,” kaka fyoti, ti nsuni ve zolaka vwanza ya kuvuuka kana . . . yankaka ve.

¹³¹ Mutindu ya kele ya kusonama na Apocalypse 13:6. Beno ke zola kulongoka yawu kaka minuti? Ti Yandi tubaka Yandi . . . ti “Kento yayi salaka bawu nyonso kuzwa kidimbu (kibulu yayi salaka), salaka bawu nyonso kuzwa kidimbu (bantu ya mputu, bantu ya nene, muntu nyonso bawu vwandaka), kidimbu ya kibulu,” yina vwandaka Dibuundu ya Katolika ya Rome.

¹³² To yina to bawu salaka kizizi . . . Apocalypse 13:14, bawu salaka kizizi na kibulu. Beno—beno . . . mu banza beno nyonso ke na kutangaka yawu. Kana ve, mbote, beto ke vutuka kaka mpe ke tanga yawu. Apocalypse 13:14:

Mpe yandi vunaka bawu yina ke zinga na zulu ya ntoto na bakutuba ya bimangu yango yina yandi kuzwaka ngolo ya kusala na ntuala ya kibulu; (Yina kele kuvukana ya dibuundu.) . . . mpe kusala na ntuala ya kibulu; na kutubaka na bawu yina ke zinga na zulu ya ntoto, ti bawu fwana sala kizizi na kibulu, yina kuzwaka mputa ya kufwa (bumpani) . . . mpe vwandaka

na mbele, mpe zingaka . . . (na nzila ya bupaapa, Rome ya mumpani na Rome ya pape. Beno me mona?)

¹³³ “Kusala kizizi na yandi.” Yinki ya zolaka vwanda? Kaka yina bawu ke na kusalaka kaka ntangu yayi, kaka kieleka, na kukotaka na kuvukana yayi ya mabuundu, “Mabuundu nyonso kele ya organisation yayi, bawu nyonso ke kota na nkonga mosi.” Ntangu yayi bawu ke na kuzwaka Biblia. Mpe Pape Jean me bokila bawu nyonso na kuvutuka. Archibishop ya Cantorbéry, bawu nyonso ke kwenda. Kima ya ntete beno zaba, kima ya muvimba ke katuka kaka na *Mama*, samu ti bawu kele bakento ya kindumba na kubanda. Beno me mona? Bawu tubaka, “Beto ke vukana kintwadi samu na dymabu mosi ya nene samu na kunwanisa Communisme.” Kasi bawu zaba ve ti Nzambi me telemisa Communisme (mu lenda talisa yawu na Biblia yayi.) mpe me sala mpe na kati ya mabanza ya bawu kuvutula yimbi ya basantu, samu na menga yina bawu mwangisaka na zulu ya ntoto. Nzambi me bongisa Communisme kaka mutindu Yandi salaka na Ntinu Nébuchadnetsar samu na—samu na kupesa kitumbu na Israël. Yandi me telemisa communisme, mpe kilumbu yandi ke zimbisa Rome na kalati mbala mosi. [Kisika ya mpamba na bande—Mu.] Ya kele kieleka. Nzambi tubaka mutindu yina. Ya kele kieleka.

Mu kele kontre communisme; ya kele mbeni ya Nzambi. Kieleka ya kele. Kasi beno sala mingi keba ve na Lele ya nela ya Kisengo, kasi beno tala mbote lele ya nele ya violet. Beno tanga *Livre des Martyrs* ya Foxe mpe beno ke mona yayi, ya kele kieleka.

¹³⁴ Ntangu yayi ti beto mona kisika beto . . . Mpe kuna beno ke mona awa ti yandi salaka bawu nyonso (bantu ya bimvwama, bantu ya mputu) na kuzwa kidimbu; kasi ya kele na kalasi yina yandi ke lenda ve kusimba. Beno zaba yawu? Apocalypse 13: . . . 8.

¹³⁵ Beno kuwa yayi. Beno bika munu kutanga yayi:

Mpe mu telamaka na zulu ya bazyelo ya mubu, mpe monaka kibulu kubasika na bamubu, vwandaka na bayintu sambwadi mpe mampoka kumi, . . . na zulu ya mampoka . . . bayimpu, mpe na zulu ya bayintu ya yandi nkumbu ya kuwwenza. (Ya kele myongo sambwadi; beto bakaka yawu nyonso mazono na nkokila, beno zaba.)

Mpe kibulu yina nge monaka vwandaka mutindu na yingo, . . . makulu mutindu—mutindu ulusu, mpe yinwa ya yandi . . . yinwa ya nkosi: mpe dalango (Ya vwandaka dyabulu ya mbwaki yina telamaka na ntuala ya kento samu na kufwa mwana ya yandi, yina vwandaka Rome, beto nyonso zaba.) . . . mpe pesaka yandi ngolo . . . , mpe kiti ya yandi, mpe lutumu ya nene.

Mpe mu monaka mosi ya bayintu ya yandi mutindu ya vwandaka ya kulwala na kufwa; (bumpani, beno me mona) mpe mputa ya yandi ya kufwa kubelukaka: (bupaapa me baka kisika ya yawu, me vukana na Buklisto, na ba-Nicolaite) mpe yinza nyonso yitukaka landaka kibulu.

136 Bukatolika me mwangana na bayinsi nyonso yina kele na yisi ya mazulu. Ya kele kieleka. Mutindu Daniel tubaka na yina me tala kisengo ke vukana na ntoto, mpe nyonso yina.

137 Mpe mu ke pesa beno mwa kima mosi na zulu ya yawu, ti “kisengo mpe ntoto.” Beno talaka, to mu tubilaka beno ntete yawu, na lukutakanu ya nene ya nsuka yina bawu kuzwaka awa kisika Khrouchtchev katulaka dipapa ya yandi mpe bulaka mesa na yawu? Ya vwandaka na bayinsi tanu ya esete ya kuvukana kuna, ya vwandaka na bayinsi tanu ya wesete. Khrouchtchev vwandaka mfumu ya bayinsi ya esete, Eisenhower vwandaka mfumu ya bayinsi ya wesete; beno tala bantwadisi zole ya nene, misapi zole ya nene ya makulu. *Khrouchtchev*, na Russie, zola kutuba “ntoto.” *Eisenhower*, na Amer-...na Kingelesi, zola kutuba “kisengo.” Beto kele na nsuka.

Mpe bawu sambilaka dalango yina pesaka ngolo na kibulu: mpe... (Ya kele nsangu ya beto yina ke landa awa na tabernacle, beno me bakula)... mpe bawu sambilaka kibulu, na kutubaka, Nani kele mutindu na kibulu? mpe nani lenda sala mvita na yandi?

138 Na bampova yankaka, beno tala awa. Eisenhower kele—kele na nkumbu ya nene awa na Etats-Unis, kasi na Rome yandi kele kima ve; na Russie, yandi kele kima mosi ve. Khrouchtchev kele nene na Russie, kasi na Etats-Unis yandi kele kima mosi ve. Kasi ya kele na muntu yina kele nene bisika nyonso, ya kele pape yango (Ya kele kieleka.) “Ti beto bongisa beto mosi kintwadi, mpe beto vukana kintwadi.”

Mpe kuna kupesamaka na yandi yinwa samu na kuzonza bima ya nene... ya kuvwenza;... mpe ngolo kupesamaka na yandi na kulandila bangonda makumi yiya mpe zole.

Mpe yandi zibulaka yinwa ya yandi mpe vvenzaka Nzambi, (mpe “vwandaka longa malongi ya balutumu ya bantu; ya dema, ya lunangu, bantu ya kuzola byese; ke lakisa mutindu ya kinzambi, ke manga Ngolo ya yawu”) ... mpe vvenzaka nkumbu ya yandi, (Me baka “Tata, Mwana, mpe Mpeve-Santu” na kisika ya “Mfumu Yesu Klisto.” Beno me mona?) mpe tabernacle ya yandi, mpe bawu yina ke zingaka na... na—na mazulu.

Mpe ya pesamaka na yandi na kusala mvita na kuteleminaka basantu, (kuna ke telama kutalisa mpasi)

mpe na kununga bawu: mpe ngolo kupesamaka na yandi na zulu ya makanda nyonso, . . . bandinga, mpe bayinsi.

Mpe bawu nyonso yina ke zinga na zulu ya ntoto—ntoto ke sambila yandi, bayina bankumbu kele ve ya kusonama na buku ya luzingu ya Mwana ya dimeme yina kufwaka na mbandukulu ya yinza. (Oh, oh, oh, oh, oh, oh, oh.)

139 “Mbandukulu ya yinza.” Bankumbu ya beto, kana ba tulaka yawu ntete na Buku, ya vwandaka ya kutula ntama kuna. Yesu tubaka, “Muntu ve lenda kwiza na Munu kana ti Tata ya Munu kubenda yandi ntete, mpe nyonso yina Tata me pesa Munu ke kwiza na Munu. Mameme ya Munu ke kuwa Ndinga ya Munu,” (Yayi kele Madya, beno me mona.) “mpe nzenza . . .”

140 Kuna yandi lenda tuba, “Mbote, mu me kuma ya dibuundu, mu kele mbote mutindu beno.” Yina kele ve Madya ya mameme.

141 *Awa* kele Madya ya mameme, “Kuvwanda kintwadi na bisika ya Mazulu na kati ya Klisto.” Oh, Yandi kele mingi mbote! Yandi kele ve? Mbote mingi.

142 Ntangu yayi beto sukisa kaka na nswalu samu ti ya me kuma, inga, ntangu me lutangu ntangu yayi. Mbote mingi. “Kasi mu ke tuba . . .” Beto mona ntangu yayi, mu kele na nzila 23:

Mpe mu ke kufwa bana ya yandi na lufwa; mpe mabuundu nyonso ke zaba ti mu kele yandi yina ke talaka na kati ya baluketo mpe bantima: mpe mu ke pesa na mosi na mosi ya beno landila na bisalu ya beno.

Kasi na beno mu ke tuba, mpe na bayankaka na Thyatire, mutindu mingi kele ve na malongi yayi, . . . (Wapi mutindu ya malongi ya vwandaka? Organisation, ba-bishop, mpe archibishop, mpe ba-pape, beno me mona.)

143 “Bayina kele ve na malongi yayi.” Ntangu yayi, Biblia, beto talaka mazono na nkokila ti Israël, na kulutaka na Moab, ba vwandaka ve yinsi. Bawu vwandaka zinga na zulu ya ntoto, mpe bawu vwandaka bantu, ya kimpwanza. Ya kele kieleka? Kifwanukusu; vwandaka yenga-yenga bisika nyonso, na batenta mpe nyonso yankaka. Bankonga ya ba-pantekote ya kele mutindu mosi, pantekote ya kieleka, ke yenga-yenga kisika na kisika. Beno me mona? Mbote mingi.

. . . mpe kele na malongi yayi ve (kasi bongisaka bawu mosi, mpe salaka organisation ya nene na yawu) . . . yina kele ve na . . . yayi, mpe yina me zaba ve bakati ya Satana, . . .

144 Ntangu yayi beno bambuka moyo beto talaka kisika kiti ya Satana vwandaka. Mazono na nkokila beto vutulaka yandi na ntonono. Wapi kisika kiti ya yandi vwandaka na ntonono? Na Babylone. Mpe Babylone . . . Ntangu bukimfumu, ntinu nganga-

Nzambi ya Babylone, ba vwandaka landa yandi na minungi ya ba-Chaldéen, yandi kwizaka na Pergame mpe salaka kiti ya yandi. Beno me mona, yandi lutisaka kiti ya yandi katuka Shinéar na Pergame. Beto tangaka kaka yawu kaka na masolo mazono na nkokila. Mpe ntangu yayi kuna yandi bandaka kuna, na kusalaka dibuundu ya Katolika, yina ya kele dyaka mama ya Babylone. Mbote mingi, “Kiti ya Satana.”

. . . mpe kiti ya *Satana*, *mutindu bawu zonzaka; mu ke tula* ata dyaka kizitu na zulu ya nge.

¹⁴⁵ “Ya ke vwanda dyaka ve na kizitu; kaka yina kele yimemni na nge.” Mwa lutangu ya fyoti yayi yina kele na kati awa, beno me mona, ya kele nyonso ya kunika na kati ya Nsungi yayi ya Mudidi. Ntangu yayi ya me kuma pene ya kumi na tanu ya bankama ya bamvula ti bawu lutilaka na yina.

Kasi ti yina nge kele na yawu yimeni kangama na yawu tii mu ke kwiza. (Na bampova yankaka, “Nge kele dyaka na Lusakumunu ya Pantekote na kati ya ntima ya nge. Kangama na yawu tii Mu ke kwiza pesa nge lusalusu, samu ti nsungi yina ke landa ke na kukwiza kaka na ntangu ke landa.”)

. . . yandi yina ke nunga, mpe ke bumba mambu ya munu tii nsuka, na yandi mu ke pesa ngolo ya kuyala bayinsi:

Mpe yandi ke yala bawu na yinti ya kisengo; mpe mutindu mbungu ya ntoto bawu ke pasuka na bandambu: mpe mutindu mu kuzwaka ya Tata ya munu.

¹⁴⁶ Beno mona, Dibundu yango, yinki ya ke vwanda ntangu Nsungi yango ya Dibundu ya Mudidi ke vumbuka na kutelama na lufundusu na kutelemina nkonga yina ya mimpani. . . ya ntama kuna? Ba ke dyata bawu! Makulu yango ya kisengo ke dyata kaka kuna, mu ke tuba na beno! “Yandi ke zenga bawu na bitini-bitini,” Biblia ke tuba.

Mpe mu ke pesa na yandi mbwetete ya suka. (Beno zaba yinki yawu kele, ve? *Klisto* kele “Mbwetete ya Suka.” Mbote mingi.)

Yandi yina kele na dikutu, ti yandi kuwa yina Mpeve ke tuba na mabuundu.

¹⁴⁷ Oh, la la! Beno kele na kyese ve! Ngunga me kwenda kaka mwa ntama. Mu kele dyaka na ndambu, mu ke baka yawu mu banza mbasi na nkokila, na zulu ya yayi ya mafunda zole ya bamvula kuna.

Kasi Yandi kele Lis ya Vallée, Mbwetete yina ke Lezimaka na Suka,
Yandi kele kitoko bambala mafunda kumi samu na moyo ya munu.

Lis ya Vallée, na Yandi kaka mu ke mona,
 Nyonso mu zola . . . mpe ke sala munu nyonso
 ya kulunga.
 Na mawa Yandi kele kubomba ya munu, na
 mpasi Yandi kele diziku ya munu,
 Yandi ke tubaka na munu na kupesa Yandi
 mpasi ya munu.
 Alleluia!
 Yandi kele Lis ya Vallée, Mbwetete yina ke
 Lezimaka na suka,
 Yandi kele kitoko bambala mafunda kumi
 samu na moyo ya munu;

148 Beno zola Yandi? Oh, mu kaka:

Mu zola Yandi, mu . . .

Ntangu yayi beto sambila Yandi ntangu yayi, Bampova
 nyonso ya ngolo yayi mpe Nsangu.

Samu ti Yandi zolaka munu ntete
 Mpe futaka mpulusu ya munu
 Na yinti ya Calvaire.

149 Yandi kele mbote ve! Mu zola Yandi. Ntangu yayi, bima
 yina mu me kondwa kubaka, ya ke vwanda na kati ya babuku,
 kieleka, samu ti beto lenda nata ve nsungi ya muvimba na
 nkokila mosi. Mu me baka yawu mwa fyoti na nkokila yayi, samu
 ndinga ya munu kele fyoti ya kukangama. Kasi, oh, Yandi kele
 mbote ve! Oh! Hmm!

Ya kele pene na bisika nyonso bantu,
 Bayina bantima nyonso kele ya kulezima,
 Na Tiya yina kubwaka na Pantekote,
 Yina sukulaka mpe vedisaka bawu;
 Oh, Ya ke na kupela ntangu yayi na kati ya
 ntima ya munu,
 Oh, nkembo na Nkumbu ya Yandi!
 Mu kele na kyese mingi ti mu lenda tuba ti mu
 kele mosi ya bawu.

Oh, mosi ya bawu, mu kele mosi ya bawu,
 Mu kele na kyese mingi ti mu lenda tuba mu
 kele mosi ya bawu, (Alleluia!)
 Mosi ya bawu, mosi ya bawu,
 Mu kele na kyese mingi ti mu lenda tuba mu
 kele mosi ya bawu.

150 Beno kele na kyese? Mu ke bambuka moyo na kukatukaka
 na Chattanooga na nkokila mosi; mpe mpepo kulumukaka na—
 na—na Tennessee, kuna na Memphis. Ba tulaka munu na hotel
 yina ya nene, ya mbote kuna. Mpe ba bokilaka munu, na
 kutubaka, “Mpepo ke kwenda mbasi na suka, na—na ngunga ya
 sambwadi.”

151 Mpe mu vwandaka na mwa ba-courrier ya kubika na boîte à lettres; na kuvutuka na yinzo, na kuvutulaka bamvutu na mwa bankundi ya munu. Mpe na kukwendaka, Mpeve-Santu tubaka, “Landila na kutambula.” Mu landilaka kaka, mu kumaka kuna na kizunga ya bantu ya ndombe.

152 Mu vwandaka ya kutelama kuna, mu banzaka, “Oh! Tala awa, ya kele ntangu samu mpepo yango kukwenda.”

153 Mpe Mpeve-Santu landilaka kutuba, “Landila na kutambula.” Kaka mutindu Yandi salaka na bayinti kilumbu yankaka kuna, beno zaba. “Landila kaka na kutambula.” Na yawu mu landilaka na kutambula.

154 Ya kuminaka munu na kutala na yisi kuna, na mosi yango ya mwa bifwede ya bandombi kisika bantu ya ndombe vwanda zinga, bantu ya mputu, na yisi kuna. Kiboba ya Tata-kento Jemima, mutindu kifwanukusu, na semisi ya babakala na ziunga ya yintu ya yandi, ya kuyekama na zulu. . . mutindu yina.

155 Mpe mu vwandaka tambula na kuyimbaka:

Mu kele . . . ya bawu, mu kele mosi ya bawu,
Mu kele na kyese mingi ti mu lenda tuba mu
kele mosi ya bawu, (Oh, Alleluia!)

“Mpe yinki Nge zola, Mfumu?”

Mosi ya bawu, mu kele mosi ya bawu,

Beno ke kwikila na kuvwanda ya kutwadisa na Mpeve? Yinga, kieleka.

Mu kele na kyese mingi ti mu lenda tuba ti mu
kele mosi ya bawu.

156 Ya me salama ya me kuma bamvula kumi na yiya me luta ntangu yayi. Yandi vwandaka tala na zulu ya kibaka. Mu vwandaka pene, oh, ya ndambu ya bloc ya bayinzo na yandi, mpe mu monaka mama yayi ya kiboba ya ndombi yina telemisaka kaka meso na kutalaka munu, beno zaba. Mbote, mu landilaka kaka, bikaka kuyimba, na kulandilaka kutambula. Mu kumaka pene ya yandi, masa ya meso ya nene na zulu ya matama ya yandi ya nene; yandi talaka munu, tubaka, “Mbote, Pasteur!”

157 Mu me baluka, mu me tuba, “Wapi faso, Tata ya kento?” Mpe yandi tubaka . . . mu me baluka, yandi vwandaka seka, yandi vwandaka na kusenga mosi ya nene na kizizi ya yandi. Mu tubaka, “Wapi mutindu nge me zaba ti mu kele pasteur?” Kuna na Sude, beno zaba, *mulongi* kele “pasteur.” Mu tubaka . . . mu tubaka, “Wapi mutindu nge me zaba ti mu vwandaka pasteur?”

Yandi tubaka, “Mu zabaka ti nge vwandaka kwiza!”

Mpe mu tubaka, “Wapi mutindu nge zabaka yawu? Nge zaba munu?”

Yandi tubaka, “Ve, tata.” Mpe yandi tubaka, “Mu zabaka ti nge vwandaka kwiza.” Yandi tubaka, “Nge me kuwaka ntete disolo ya kento ya Sunamite?”

Mu tubaka, “Yinga, tata.”

158 Mpe yandi tubaka, “Mbote,” yandi tubaka, “Mu kele mutindu kento yina.” Yandi tubaka, “Mpe Mfumu pesaka munu bébé, mpe mu tubaka na yandi. . . tubaka na Yandi ti mu ke zangula yandi.” Yandi tubaka, “Mu kele kento ya mputu. Mu ke sukulaka bilele mpe ke salaka samu mindele samu na kuzinga.” Yandi tubaka, “Mpe Yandi tubaka na munu ti Yandi—Yandi ke pesa munu bébé, mpe mu tubaka na Yandi ti mu ke yindula yandi.” Yandi tubaka, “Mu me yindula yandi na mutindu ya mbote mu zabaka, kasi” yandi tubaka, “Pasteur, yandi vukanaka na nkonga ya bantu ya yimbi. Yandi kuzwaka kimbevo, mpe beto vwandaka zaba kima ve na zulu ya yawu.” Yandi tubaka, “Yandi me kuzwa yawu na kitezo ya kulutila. Mpe yandi ke na kufwaka, na kati kuna na zulu ya mbeto.” Yandi tubaka, “Yandi me zimbiza mabanza ya yandi ntangu yayi, ya me kuma bilumbu zole.” Yandi tubaka, “Dokotolo me kwiza mpe me tuba, ‘Ya me kudya ntima ya yandi mpe nyonso yankaka, me kota na nzila ya nenga, na mutindu ya yimbi mingi tii ya me bebisa yandi; na yawu ti kima mosi yina ba me pesa yandi ke sadisa yandi ve ntangu yayi.’” Mpe yandi tubaka, “Yandi ke na kufwaka.” Mpe yandi tubaka, “Mu ke na kulenda kaka ve kutelama kumona yandi kufwa, musumuki.” Mpe yandi tubaka, “Mu sambilaka mpe mu sambilaka,” yandi tubaka, “mpimpa nyonso ya muvimba mu sambilaka.” Yandi tubaka, “Yandi me zimbisa mabanza ya yandi, yandi zaba kima mosi ve.” Yandi tubaka, “Yandi me zimbisa ya me kuma bilumbu zole.”

159 Yandi tubaka, “Mu sambilaka, mu tubaka, ‘Mfumu, Nge pesaka munu bébé yango’ mpe tubaka, ‘mutindu Nge salaka na kento ya Sunamite.’ Yandi tubaka, ‘Wapi kisika kele Elie ya Nge? Wapi kisika kele. . .?’ Yandi tubaka, ‘Mbote, wapi kisika—wapi kisika kele kima mosi samu na kusadisa munu?’”

160 Mpe yandi tubaka, “Mu kotaka na pongi ya kufukama.” Mpe yandi tubaka, “Mfumu zonza na munu, na ndosi,” mpe yandi tubaka, “‘Kwenda na ngaanda mpe telama na mwelo. Mpe ya ke vwanda na muntu ke kulumuka bala-bala, ya kulwata mwa yimpu ya marron, mpe kazaka ya ndombe.’ Yandi tubaka, ‘Yandi ke zonza na nge.’”

161 Mpe yandi tubaka, “Mu kele ya kutelama awa tuka bwisi kutsya.” Mpe mukongo ya yandi vwandaka ya kupola na kinoko. Mpe yandi tubaka, “Mpe mu me mona nge kukwiza na yimpu yango ya marron,” yandi tubaka, “kasi nge zolaka vwanda na mwa nkutu.”

162 Mu tubaka, “Mu me bika yawu na hotel.” Beno me mona? Mpe mu tubaka, “Mwana ya nge ya bakala ke na kubelaka?”

Yandi tubaka, “Yandi ke na kufwaka.”

Mu tubaka, “Nkumbu ya munu keke Branham.” Mu tubaka, “Nge zaba munu?”

Yandi tubaka, “Ve, tata, Pasteur Branham, mu—mu me kuvwaka ntete ve na nge.”

Mu tubaka, “Mu ke sambila samu na bantu ya kubela.” Yandi tulaka mabanza na yawu ve. Yandi vwandaka zola ve ti mwana ya yandi ya bakala kufwa, musumuki.

¹⁶³ Mu kotaka; ba vwandaka na mwelo mosi ya ntama kuna na zulu ya yina soc ya charrue vwandaka ya kulelika samu na kuvutulaka yawu (ya lendaka vwanaka na mingi ya beno bantu ya Node yina ke zaba ve yina ya kele), kasi, samu na kubika mwelo ya kukangama. Mpe mu kotaka na yinzo, ya mwa, bivinga zole, ya fyoti, ya ntama (ya vwandaka talana mutindu mwa . . . yina beto ke bokilaka mwa “pavillon de chasse”) mutindu, na kuvwandaka kuna; ya kele na kivinga *awa*, mpe yina kele salon, kivinga ya kulalila, mpe nyonso kintwadi; mpe kikuku na manima *kuna*. Ntangu mu kotaka na kati . . . Ya vwandaka mwa kisika mosi ya mbote, ba lengisaka mpemba, balweka vwandaka ya kukatuka, mpe mabaya. Na yawu kuna . . . Ve, mu banza ti yandi vwandaka na papier goudronné na zulu ya muludi, Mu ke bambuka moyo kumonaka bakuvimba ya nene mutindu kinoko, na zulu ya yawu.

¹⁶⁴ Na yina ntangu mu kotaka, ya vwandaka na kidimbu ya kulelika kuna na kielo yina, yina vwandaka tuba, “Nzambi Sakumuna Yinzo ya Beto.” Kaka awa na nsongi vwandaka na mbeto ya ntama na lweka awa, mpe mosi na lweka awa. Kuna vwandaka ya kulala muntu mosi ya nene (ya vwandaka ve na tapis na ntoto), mwana ya bakala ya nene, mwana mosi ya bakala na kutala ya kitoko mingi vwandaka kuna. Mu banza yandi vwandaka . . . ya bakilo makumi nana na tanu to makumi yivwa, pene ya bametele mosi na ndambu. Mpe yandi vwandaka na divunga na diboko ya yandi, vwandaka sala, “Uhm. Uhm.”

¹⁶⁵ Mpe kento yina tubaka, “Bébé ya mama.”

¹⁶⁶ Mpe mu banzaka, “Bébé ya mama.” Mpe dyaka yandi vwandaka—yandi vwandaka na kimbevo yina ke katukaka na kuvukisa banzutu, syphilis. Mpe yandi—yandi vwanaka kufwa.

¹⁶⁷ Mpe yandi pesaka yandi bize na mbunzu, mpe me nyonguta yandi mutindu yina, na kutubaka, “Bébé ya mama.”

¹⁶⁸ Mbote, ntima ya munu kumaka kaka nene. Mu banzaka, “Yinga, ata mutindu kati beno kele na kati ya disumu, beno kele dyaka bébé ya yandi.” Kuna mu banzaka, “Benome mona, ata mutindu yimbi yandi vwandaka, yandi kele dyaka ‘Bébé ya mama.’” Mpe mu banzaka, “Nzambi ke tuba, ‘Mama lenda zimbana mwana yina yandi me pesa mabene; kasi Mu lenda ata mbala mosi ve kuzimbana nge, samu ti nkumbu ya nge kele ya

kukangama na kati ya diboko ya Munu.” Beno me mona? Wapi mutindu ya lendaka vwanda!

169 Mu talaka santu yango ya mputu ya kiboba yina vwandaka tambula na kizunga kuna. Beno zolaka tuba, mpangi, yandi vwandaka na kima mosi ve na yinzo; kasi yandi vwandaka na kima na yinzo yina ti konso yinzo na Indiana to bisika nyonso zolaka kuzwa; ya kele Nzambi. Mu ke zola mingi kuzwa yawu kulutila na kuzwa yinzo ya nene ya kitoko na bafoto ya bana ya bakento ya kulwata yimbi ya kulelika, mpe nyonso yayi ya busafu yayi, kima mosi ya yimbi. Biblia ya ntama vwandaka kuna kisika Yawu vwandaka ya kuzibula, ba-page ya ntama ya kufutika na Yawu.

170 Mu talaka kento yina. Mpe yandi tubaka, “Pasteur me kwiza sambila samu na nge, cheri.”

171 Yandi salaka, “Uhm. Uhm. Mudidi. Uhm.”

172 Mpe mu tubaka, “Yinki yandi ke na kutubaka?”

Yandi tubaka, “Yandi zaba ve. Dokotolo tubaka, ‘Yandi kele na ngaanda ya yintu ya yandi.’” Yandi tubaka, “Yandi ke banza ti yandi kele na ngaanda na mubu ya nene kisika mosi, mpe yandi ke na kuyabaka maswa, mpe ti yandi me zimbana.” Mpe yandi tubaka, “Ya kele yina mu lenda lenda ve, Pasteur: na kuzabaka ti bébé ya munu ke na kufwa, ya kuzimbana.” Mpe yandi tubaka, “Mu zaba ti nge me kwiza samu na kusadisa munu, samu ti Mfumu tubilka munu yawu.”

Mu tubaka, “Mu ke sambila samu na yandi,” mpe mu tubaka, “mu banza ti Mfumu ke belusa yandi.”

173 Yandi tulaka mabanza na yawu ve, yandi vwandaka zola kaka ti yandi kutelama mpe kutuba ti yandi vwandaka ‘ya kuvuuka.’ Kaka yina, kana kaka ti yandi vwandaka ya kuvuuka. Ata ti, yandi zolaka kwenda na mutindu nyonso, na yawu, kilumbu mosi; kana kaka ti yandi vwandaka ya kuvuuka! Oh, kana beto zolaka kuzwa kaka nkadulu yina! Yinzo yango ya Seko kuna, yandi zabaka ti yandi ke zinga dyaka na yandi kuna.

Yandi tubaka, “Kana mu lendaka kuwa yandi kutuba yandi vwandaka ‘ya kuvuuka.’”

Mu tubaka, “Beto fukama.” Mpe yandi fukamaka. Mpe mu bakaka kaka makulu ya yandi, mpe makulu ya yandi vwandaka kieleka madidi mpe ngolo. Mpe mu lendaka ve kufuka yawu, yandi tulaka na zulu ya yandi kuna mwa—mwa divunga ya fyoti; mpe yandi vwandaka kaka na kaleso ya yandi, beno zaba.

174 Mpe na yawu yandi. . . Mpe yandi vwandaka benda yawu na kuvutulaka yawu, na kubanzaka kaka ti yandi vwandaka na kati ya yawu. Yandi kangamaka na yawu, mpe vwandaka banza ti yandi vwandaka yaba. Yandi landilaka na kutuba, “Ya kele mudidi mingi. Uhm. Uhm. Ya kele mudidi mingi.” Na yawu kuna

yandi mekaka na kuzonza na yandi; mpe yandi vwandaka landila kutuba, “Ya kele mudidi mpe madidi,” na kubendaka kaka.

175 Kuna mu—mu talaka kento yina mwa ntangu fyoti, mpe yandi vwandaka ya kufukama kuna, mpe mu tubaka, “Tata ya kento, nge ke zola kutwadisa beto na kisambu?”

Yandi tubaka, “Yinga, tata.”

176 Kaka yandi, mpe munu, mpe mwana ya bakala, mpe Mpeve-Santu na kivinga, kaka yina. Santu ya kiboba yina sambilaka. Oh! Ntangu yandi vwandaka zonza na Yandi, beno ke zaba ti yandi me zonzaka na Yandi na ntuala. Yinga, tata! Yandi zabaka na nani yandi vwandaka zonza. Yandi tubaka, “Mfumumu, mu zaba ve yinki Nge ke sala,” yandi tubaka, “kasi kima nyonso kele kaka mutindu Nge tubilaka yawu.”

177 Oh, la la! Oh! Mu kele na kyese mingi, na nsayi mingi ti Yandi kele dyaka Yesu mosi vwandaka ntama kuna na basantu yango mosi na ntama kuna. Yandi kele dyaka Yesu mosi bubu yayi.

178 Mpe mu yifulaka yandi ata mbala mosi ve na yina me tala lukwikilu ya yandi, kana ti yandi vwandaka Baptiste, ya Pantekote, to nyonso yankaka. Yina vwandaka ve dyambu ya munu. Mu vwandaka—mu vwandaka landa kaka Mpeve-Santu, mpe yandi vwandaka sala kima mosi. Beto vwandaka zola kumona yinki Yandi zolaka sala.

179 Na yawu yandi fukamaka, mpe bandaka na kusambila. Ntangu yandi manisaka na kusambila, yandi me telama mpe me pesa yandi bezé na yintu ya yandi, na kutubaka, “Nzambi, sakumunu bébé ya munu.”

180 Mpe kuna yandi tubaka, “Ntangu yayi nge ke sambila, Pasteur?”

181 Mpe mu tubaka, “Yinga, mama.” Mpe kaka kuna ngunga vwandaka pene ya ngunga nana na ndambu, mu banza baminuti kumi na tanu na yivwa, mpe mu vwandaka . . . bakilometele tatu na ndambu na kisika, mpe—mpe mpepo vwandaka kwenda na ngunga ya sambwadi; mpe mu vwandaka zaba ve ntangu mu zolaka basika.

182 Na yawu mu tulaka maboko ya munu na zulu ya makulu ya yandi, mu tubaka, “Tata ya Mazulu, mu ke na kubakulaka yayi ve. Mpe Nge . . . mu—mu zolaka kuzwa mpepo mwa ntangu fyoti me luta, pene ya ngunga mosi na ndambu me luta. Nge vwanda tuba kaka landila, ‘Kutambula,’ mpe dyaka yayi kele kaka kima yina mu me mona. Mpe yandi me tuba ti Nge . . . yandi monaka munu kukwiza. Kana ya—kana ya vwandaka Nge, Mfumumu, na yina mu zaba ve yinki kusala kasi kaka kutula maboko ya munu na zulu ya mwana ya bakala.”

183 Yandi tubaka, “Oh, mama,” yandi tubaka, “ya ke na kukumaka na nsemo na kati awa ntangu yayi.” Mpe pene ya

baminuti tanu na kuna, yandi me vwanda na lweka ya mbeto, na maboko ya yandi ya kuzungidila mama ya yandi.

¹⁸⁴ Mu me basika na malembe, mu me baka mbangu kuna mpe me baka taxi, mpe me baka mbangu na hotel samu na kuzwa valise ya munu. Mpe banzaka mu ke kwenda kuna mpe ke vingila kaka, mu banza fwana vingila kilumbu mosi to zole na bilumbu yango. Beno zaba mutindu mpasi ya vwandaka kaka na manima ya mvita kuna na kuzwa mpepo, na yawu mu banzaka, “Mu ke vingila bilumbu zole.”

¹⁸⁵ Mpe mu kotaka na taxi mpe kwendaka mbangu kuna, na aéroport. Kaka na yina mu kotaka kuna, ba tubaka, “Mpepo numelo 196 na Louisville, na Kentucky, ke kwenda ntangu yayi.” Nzambi simbaka mpepo yina na ntoto samu na munu, mutindu yina. Oh, mu ke kwikila yawu!

¹⁸⁶ Pene ya bamvula zole na kuna, mu vwandaka kwenda na train, mu vwandaka kwenda na Arizona, na Mpangi Sharrit, kuna na lukutakanu. Mpe na yawu mu bakaka Mpangi Moore mpe yankaka. Mpe na yawu ntangu mu vwandaka kwenda kuna, mu sutopeke kuna na Memphis. Mpe train kotaka na gare, kana beno zaba mutindu yawu ke kotaka na gare na kukwendaka na wesete mutindu yayi, mpe kuna ke vutuka manima na kubasika mpe ke vwanda na plaque tournante mpe ke sikama.

¹⁸⁷ Mpe ba-sandwiche ya bawu na train, ba vwandaka teka kitini mosi ya yawu pene ya ba-cents makumi sambanu. Mpe mu lendaka sumba yawu ba-cents kumi, kumi na tanu, beno zaba, na ngaanda kisika mosi. Mpe mu vingilaka kaka tii train kusutopeke, samu na kuzwa mwa ba-sandwiche samu na munu. Mu zolaka kwenda kuzwa samu na munu ha-... saki ya kufuluka na ba-hamburger, mpe kieleka kuzwa jubilé na kukwendaka kuna. Na yawu mu basikaka na mbala mosi mpe kwendaka na mbangu kuna kieleka na nswalu, samu na kuzwa kiosque ya ba-hamburger; mu zolaka sosa, train zolaka vwanda kuna pene ya baminuti makumi tatu.

¹⁸⁸ Mpe kuna mu—mu bandaka na kuzwa samu na munu mwa ba-hamburger, mpe mu kuwaka muntu mosi kutuba, “Mbote, kuna, Pasteur!” Mpe munu na kubalukaka me tala, mwa yimpu ya mbwaki, muntu ya kutelama kuna me byeta meso, beno zaba, yandi tubaka, “Nge me zaba munu ve, nge zaba munu?”

“Mu banza ve, mwana.”

Yandi me belama, me tuba, “Tala munu mbote!”

Mpe mu tubaka, “Yinga?” Mu tubaka, “Mu banza ve ti mu zaba nge.”

Yandi tubaka, “Mu zaba nge!” Yandi tubaka, “Nge kele Pasteur Branham!”

Mpe mu tubaka, “Yinga, ya kele kieleka.” Mu tubaka, “Nge me vwandaka ntete na mosi ya balukutakanu ya munu?”

Yandi tubaka, “Ve, tata!” Yandi tubaka, “Nge ke bambuka moyo na suka yina ke kwizaka na yinzo mpe mama ya munu vwandaka vw-...?”

“Oh!” Mu tubaka, “Nge kele yandi ve!”

Yandi tubaka, “Yinga, ya kele munu! Yinga, ya kele munu!” Yandi tubaka, “Pasteur,” yandi tubaka, “Mu kele ya kubeluka, na mavimpi, mpe mbote. Mpe kaka yina ve, kasi mu kele Muklisto ntangu yayi!”

189 Lukumu na Mfumu! Oh!

Bawu vwandaka ya kuvukana na kivinga ya zulu,
 Bawu nyonso vwandaka sambila na Nkumbu ya Yandi,
 Bawu vwandaka ya kubotama na Mpeve-Santu,
 Mpe ngolo ya kisalu kwizaka;
 Ntangu yayi yina Yandi salaka samu na bawu kilumbu yina
 Yandi ke sala samu na beno mutindu mosi,
 (Beno kele na kyese ve?)
 Mu kele na kyese mingi ti mu lenda tuba ti mu kele mosi ya bawu.

Mosi ya bawu, mosi ya bawu,
 Mu kele na kyese mingi ti mu lenda tuba mu kele mosi ya bawu, Alleluia!
 Mosi ya bawu, mu kele mosi ya bawu,
 Mu kele na kyese mingi ti mu lenda tuba ti mu kele mosi ya bawu.

Bawu kele ve na dongosolo ya nene mpe nyonso:

Na yawu bantu yayi lendaka vwanda ya kulongoka ve,
 To kudikembisa na kuzabana na yinza,
 Bawu nyonso kuzwaka Pantekote ya bawu,
 Kubotamaka na Nkumbu ya Yesu;
 Mpe ke na kutuba bisika nyonso, ntangu yayi,
 Ngolo ya Yandi kele dyaka mosi,
 Mu kele na kyese mingi ti mu lenda tuba ti mu kele mosi ya bawu.

Mosi ya bawu, mu kele mosi ya bawu,
 Mu kele na kyese mingi ti mu lenda tuba ti mu kele mosi ya bawu, Alleluia!
 Mosi ya bawu, mosi ya bawu,
 Mu kele na kyese mingi ti mu lenda tuba ti mu kele mosi ya bawu.

Beno kwiza, mpangi ya munu, kusosa
 lusakumunu yayi
 Yina ke vedisa ntima ya nge na disumu,
 Ya ke sala bangunga ya kyese kuwakana
 Mpe ke bumba moyo ya beno na tiya;
 Oh, ya ke na kupela ntangu yayi na kati ya
 ntima ya munu,
 Oh, nkembo na Nkumbu ya Yandi,
 Mu kele na kyese mingi ti mu . . .

Ntangu yayi beno pesa mbote na muntu na mantwala, na manima, mpe pene:

Oh, mosi ya bawu, mosi ya bawu,
 Mu kele na kyese mingi ti mu lenda tuba ti mu
 kele mosi ya bawu, Alleluia!
 Mosi ya bawu, mosi ya bawu,
 Mu kele na kyese mingi ti mu lenda tuba ti mu
 kele mosi ya bawu.

Mosi ya bawu, mosi ya bawu,
 Mu kele na kyese . . . ? . . .
 . . . mosi ya bawu,
 Mu kele na kyese mingi ti mu lenda tuba ti mu
 kele mosi ya bawu.

Mu kele mosi ya bawu, mosi ya bawu,
 Mu kele na kyese mingi ti mu lenda tuba ti mu
 kele mosi ya bawu, Alleluia!
 Mosi ya bawu, mosi ya bawu,
 Mu kele na kyese mingi ti mu lenda tuba ti mu
 kele mosi ya bawu.

¹⁹⁰ Yinki kele nsambulu yayi ya ntangu ya ntama? Ya bandaka ntama *awa*, mpe yawu basikaka mingi nzila nyonso na yisi na Menga ya Yesu Klisto. Oh, la la! Oh, mutindu mu kele na kyese samu na Nsangu ya mbote! Oh! Oh, yinga, tata!

Ya ke na kubasika mingi na menga, yinga, ya
 ke na kubasikaka mingi na menga,
 Nsangu ya mbote ya Mpeve-Santu yayi ke na
 kubasika mingi na menga,
 Menga ya bilandi (bambang, nzila nyonso),
 bayina kufwaka samu na Kieleka,
 Nsangu ya mbote ya Mpeve-Santu yayi ke na
 kubasika mingi na menga.

Ntangu yayi, wapi mutindu ya Nsangu ya mbote Yawu kele? Mutindu Yawu bandaka na Pantekote, beno me mona.

Muntu ya ntete yina kufwaka samu na dyambu
 ya Mpeve-Santu yayi,
 Vwandaka Jean Mubotiki (Beno me mona,
 yandi kuzwaka, na kivumu ya mama ya

yandi, beno zaba)...kufwaka mutindu muntu;
 Na manima kwizaka Mfumu Yesu, ba komaka Yandi na kulunsi,
 Yandi longaka ti Mpeve ke vulusa bantu na disumu.

Ya landilaka na kubasika mingi na menga,
 inga, kubasika mingi na menga,
 Nsangu ya mbote ya Mpeve-Santu yayi ke na kubasika mingi na menga,
 Menga ya bilandi yina kufwaka samu na Kieleka,
 Nsangu ya mbote ya Mpeve-Santu yayi ke na kubasika mingi na menga.

Beno lenda bongisa Yawu ve! Huh-uh!

Ya vwandaka na Pierre mpe Paul, mpe Jean ya kimpeve,
 Ba pesaka baluzingu ya bawu samu Nsangu ya mbote yayi lezima;
 Ba vukisaka menga ya bawu, na baprofete ya ntama,
 Samu Ndinga ya kieleka ya Nzambi kupesama na kusungama.

Landilaka na kubasika mingi na menga, yinga,
 kubasika mingi na menga,
 Nsangu ya mbote ya Mpeve-Santu yayi ke na kubasika mingi na menga,
 Menga ya bilandi yina kufwaka samu na Kieleka,
 Nsangu ya mbote ya Mpeve-Santu yayi landilaka na kubasika mingi na menga.

Ya vwandaka na moyo na yisi ya autel, vwandaka dila, "Bilumbu yikwa?"
 Ntete Mfumu kunganina bayina kusalaka yimbi;
 Kasi ya ke vwanda na mingi yina ke pesa menga ya luzingu ya bawu
 Samu ti Nsangu ya mbote ya Mpeve-Santu yayi mpe ya kele kifuluka ya mbwaki.

Ke na kulandila na kubasika mingi na menga,
 inga, ya ke na kubasikaka mingi na menga,
 Nsangu ya mbote ya Mpeve-Santu yayi ke na kubasika mingi na menga,
 Menga ya bilandi yina kufwaka samu na Kieleka,
 Nsangu ya mbote ya Mpeve-Santu yayi ke na kubasika mingi na menga.

191 Ntangu yayi, na ntangu ya Pantekote, mpe bambangi ya Pantekote, kuna na dibuundu ya Ephèse, kuna na Pergame, kuna na Thyatire, tii na—na Sardes, na ya Ephèse. . .to na ya Philadelphie, mpe kuna tii na Laodicée. Mpe ntangu yayi yinki beto. . .kusalamaka na yisi awa? Mutindu Biblia ke tuba, nyonso ke na kwiza, mpe kibulu yayi ke telama na Etats-Unis.

192 Beno ke bambuka moyo na vision yina ba tangaka awa, na mvula 1933? Mu wandaka kwenda. . .Dibuundu wandaka ntete ve ya kutunga. Mu zabaka ve yinki wandaka vision, mu bokilaka yawu “transe.” Mu wandaka kaka ntwenya ya mulongi ya Baptiste, mpe beto wandaka. . .

193 Luzingu ya munu nyonso mu monaka ba-vision, mpe mu ke lomba na muntu mosi na kutelama mpe kutuba kana mosi ya yawu kukondwaka ntete. Ve, ata mbala mosi ve! Ya lenda ve! Beno me mona? Ya lenda ve!

194 Mpe ntangu yayi, mpe mutindu mu wandaka banda lukolo ya Lumingu mu kotaka na transe. Beto wandaka kuzwa yawu na lweka awa na Masonic home ya ntama, na kisika ya Charlie Kern, mwa nkonga ya beto. Mpe mu monaka Mfumu ya luyalu yayi Roosevelt kutwadisa yinza na mvita ya yinza ya muvimba. Mu tubaka na ntuala! Mu tubaka, “Mpe ya kele na ba-isme tatu: Nazisme, mpe Fascisme, mpe Communisme.” Mu tubaka. . . (Bantu yikwa na kati awa ke bambuka moyo?) Mu tubaka, “Beno bumba meso na Communisme, ya ke vwanda na yintu ya nyonso kuna.” Mu tubaka, “Ethiopie, Mussolini ke kwenda na Ethiopie, kasi yandi ke kubwa.” Mpe mu tubaka, “Beto na nsuka ke kwenda na mvita na Allemagne, kasi” Mu tubaka, “Allemagne ke vwanda ya kukeba ngolo na, na kikunku ya nene ya sima.” Bamvula kumi na mosi ntete ba tunga Nzila ya Maginot, bamvula kumi na mosi.

195 Mu tubaka, “Na yina na manima ya mvita. . .Beto na nsuka ke nunga yawu. Mpe na manima mvita me manisa, ya ke salama ti science ke vwanda na kusala bima ya nene.” Mpe mu tubaka, “Ntangu bawu ke sala, bawu ke sala tomabilu, mpe ba ke landila na kuzenga na yisi batomabilu.” (Beno zaba mutindu ya wandaka talana na mvula 1933.) Ntangu yayi kuna, mu tubaka, “Ya ke kuma mutindu meki, ke talana mutindu meki. Samu ti mu monaka na auto-route, na auto-route ya ntete, ditoma yina wandaka kwenda na nzila yina wandaka ve na volant na yawu. Ya wandaka ya kutwadisa na ngolo mosi.” Ba me kuzwa yawu kaka ntangu yayi.

196 Mu tubaka, “Na kati ya ntangu yina. . .Ntangu yayi bawu ke pesa muswa na bakento na kusala vote; mpe bakento, na kuvoteke, na nsuka. . .” Mu tubaka, “Yinsi yayi kele yinsi ya kento, ya kele na kidimbu ya kento. Ya kele kaka kento nzila nyonso na profesi, bisika nyonso; mpe lutangu kumi na tatu bisika nyonso na profesi.” Mpe mu tubaka, “Ya kele yinsi ya

kento, yandi kele na kimpwanza awa. Mpe yandi ke bebisa yawu, yandi kele kubebisa ya yinza.”

197 (Mpe, Roy, mu kuzwaka mikanda ya nge na zulu ya yawu, kento ya nene yina. . . “Konso dyambu ya kufwa muntu. . . Beto. . . Mu me fyongonina yawu ntangu yayi: konso dyambu ya kufwa muntu yina me salamaka ntete na Etats-Unis, kento vwandaka na manima ya yawu.” Ya kele kaka kieleka. Ya kele bakento ya kukondwa buzitu, beno me mona, mpe nyonso.)

198 Ntangu yayi, na yawu kuna mu tubaka, “Ya ke vwanda na ntangu yina, na kati ya ntangu yina ti bakento ke vwanda na muswa ya kusala vote, mpe bawu ke soola muntu mosi ya yimbi.” Ba salaka yawu na bavote yayi nsuka. Ya kele kieleka. “Yina ke banda kuyala ya kingolo-ngolo. Na kati ya ntangu yina ya ke salama ti—ti ya ke vwanda na kento mosi ya nene yina ke telama na Etats-Unis, yandi ke vwanda ya kulwata na mutindu ya kitoko mingi,” mpe mu ke tula ba-paranthèse: “(mu banza dibuundu ya Katolika).” Beno me mona? “Yina ke baka bukuyala na ngolo, ke nunga bayankaka na Etats-Unis. Yandi ke vwanda kitoko mingi na kutala, kasi yandi ke vwanda na ntima ya yimbi na mutindu yandi lendaka vwanda.”

199 Mu tubaka, “Kuna mu talaka dyaka, mpe mu monaka Etats-Unis kupasuka kaka na bitini-bitini. Ya vwandaka ve na kima bikanaka na zulu ya yawu.”

200 Mpe kuna mu kanisaka. “Ntangu yayi yayi, yina vwandaka MUTINDU ME TUBA MFUMU.”

201 Mpe beno banza! Na tanu ya basambwadi ya bakukanisa yango, me salama yimeni.

202 Dibuundu yina ke yala, dibuundu ya Katolika. Mpe ke kwiza nsuka ya ntangu.

203 Mpe mu tubaka, “Mu monaka, ya vwandaka talana mutindu bisina ke na kunyengaka; matadi, vwandaka kupasuka; mpe Etats-Unis ya muvimba kubebaka kaka, ya vwandaka mutindu yina, mutindu ntama mu lendaka kumona landila kisika mu vwandaka ya kutelama.”

204 Mpe mu tubaka, “Mu kanisaka, landila na mutindu ntangu ke na kutambula, ya ke vwanda ntangu mosi na kati-kati ya mvula 1933 mpe mvula 1977.” Mpe ya ke salama na nswalu samu ti na kati ya ntangu fyoti yina ya salama kuna.

205 Mpe beto kele ya kuvwanda na zulu ya mfututu ya baril, bankundi. Nyonso me yilama.

206 Oh, kasi Tata ya beto ya ntalu ya Mazulu Yandi silaka, Yandi silaka! Ya kele ve mbote mingi na kuvwanda kisadi ya Klisto? Bima nyonso yina Yandi silaka! Mpe beno banza; beto kele na bweso. Yandi ke na kuzingaka kaka awa. Yandi kaka na beto awa, zaba konso dinsweki ya ntima, zaba nyonso na zulu ya beno;

milaka yango ya tiya ke na kulutaka kaka na bantima ya beto, Yandi zaba nyonso na zulu ya beto, ke zolaka beto.

207 Mpe beno kele ve na kyese na kuvwanda na kati ya mwa nkonga yango ya lutangu ya fyoti, na nkokila yayi, bayina ke bumba Lukwikilu? Samu ti ya vwandaka lutumu ya Yandi, “Beni vwanza na boma ve, nkonga ya fyoti ya mameme, ya kele Tata ya beno me tala mbote na kupesa beno Kimfumu. Mpe kana ti kosalu yayi ba zenga yawu nkufi, ya ke vwanza na ata nsuni ke vuuka.” Beni me mona, beto kele kaka na ntangu ya nsuka.

208 Ba-Pentecotiste me kuma madidi, tiya ve madidi ve, Nzambi me luka bawu na yinwa.

209 Kaka mwa nkonga mosi ya fyoti mingi awa yina ke na kubasisa, kaka fyoti, kasi samu na yandi ke kwiza: “Tala, Bakala ya makwela ke na kwisa!” Mpe ntangu yawu ke salama, konso mosi ya bantangu ya mpimpa yayi, konso ntangu ya bantangu ya mpimpa yayi, na . . . Beni bambuka moyo, ya kele na bantangu sambwadi ya mpimpa yango. Mpe beto kele kaka na kati ya ntangu ya nsuka ya mpimpa yayi. Kasi mosi na mosi ya bamwense yango ya ntama me telama awa. Amen! Oh, yinki ya vwandaka? Mpeve-Santu mosi.

210 Na manima ntangu dibuundu me kota . . . Mutindu beto bakaka Lumingu na nkokila, Joseph na kusalaka yandi mosi kuzabana na Israël, bampangi ya yandi, yandi basisaka kento ya yandi ya makwela, bawu nyonso, mpe vutulaka bawu na yinzo ya mfumu. Mpe yandi telamaka yandi mosi na ba-Juif, mpe tubaka, “Mu kele Joseph, mpangi ya beno ya bakala.”

211 Ya kele kaka ya kutula awa na Masonuku kisika ba tubaka ya ke vwanza na kilumbu ya kunyonga, mpe konso yinzo ke nyonga samu na yawu mosi.

212 Bawu tubaka, “Wapi kisika Nge me kuzwa bamputa yina?”

Bawu ke tuba, “Na maboko ya . . .”

“Na maboko ya Nge?”

Yandi ke tuba, “Na yinzo ya bampangi ya Munu.”

213 “Bawu yina tobolaka Yandi ke tala na Yandi.” Mpe kuna Yandi ke telama, Joseph.

214 Yandi tubaka, “Ve . . .” Mutindu Joseph tubaka, “Beni kudasukila beno mosi ve, samu ti Nzambi salaka yawu samu na kukeba luzingu.” Yinki? Luzingu ya Dibundu, Bantu ya makanda, “Samu na mbote ya Nkumbu ya Yandi, me soola bantu na kati ya Bantu ya makanda.”

215 Oh, beto kele na nsuka, bankundi ya munu. Beto kele awa! Lusakumunu vwanza na Nkumbu ya Mfumu! Beto yimba nkunga yayi ya mbote ya ntama, mutindu bampangi ya babakala mpe ya bakento ya pantekote kintwadi. Ntangu yayi, beno ke tuba, “Mbote, mu kele Baptiste.” Kasi kana beno kele na

Lusakumunu ya Pantekote, beno kele ya pantekote. Uh-hum. Mbote mingi. Mbote mingi:

Nsinga ya ngwisani kusakumuka
 Bantima ya beto na kati ya zola ya Miklisto;
 Kubundana ya bantu ya mabanza mosi na
 kimpeve
 Mutindu yina ya zulu.

²¹⁶ Ntangu yayi beno kuwa, bankundi. Kana ya kele na muntu mosi awa na kati-kati ya beto, kana kisika mosi na nzyetolo ya luzingu, ti mwa ndudi me kota na ntima ya beno, (Beno kuwa munu!) beno basisa yawu kuna ntangu yayi. Beno sala yawu, beno bika ata kima mosi ve. . .

[Mpangi mosi ya kento ke na kuzonzaka na ndinga yankaka. Kisika ya mpamba na bande. Mpangi mosi ya bakala ke na tendula—Mu.] Amen. [Mpangi mosi ya bakala ke na kuzonzaka na ndinga yankaka mpe na manima ke tendula.] Amen. Amen.

²¹⁷ Mfumu Yesu, beto ke tonda Nge samu na bansangu yayi. Ya ke ningisa beto, Mfumu na kuzabaka ti beto me bumba kima mosi ve kasi me bumba lukwikilu. Oh, mu ke sambila, Nzambi, ti Mpeve ke landila na kuvwanda na kati ya dibuundu. Bumba beto pene ya mosi na yankaka, Tata. Bumba beto na Nge. Mpe tambula na kati-kati ya beto, Mfumu, na nsungi ya nsuka yayi ya mwinda yina beto ke na kuzingila. Vwanda Nsemo ya beto. Lezima na zulu ya beto, na bantangu yayi ya nene ya mudidi, Mfumu, samu ti beto me bakula ti *mwinda* mpe *bambwetete* ke zonzila na “mudidi.” Mpe Mfumu, beto kele na kyese ti beto kele bana ya Nsemo, na kutambulaka na Nsemo ya Nzambi. Beto kele ve ya kukangama na bima ya ntoto, kasi beto kele bana ya Nge. Wapi mutindu beto ke tonda Nge samu na bima yayi.

²¹⁸ Beto ke tonda Nge na kufidisaka bansangu yayi mutindu kusiamisa ya Ndinga ya Nge. Ti Nge vwanda ntangu nyonso ya kuzitisa na kati-kati ya beto, Tata. Ti Nge bumba beto na ndudi nyonso ya ntoto. Bumba beto ya kusantisa, ti baluzingu ya beto ke vwanda ya kuvedila mpe ya kutsyema mpe ya santu na ntwala ya Nge. Ti Menga ya Yesu Klisto kusala yayi samu na mosi na mosi ya beto, Mfumu. Katula na kati-kati ya beto, kana ya kele na kima ya fyoti yina kele ya kulunga ve. Katula yawu na beto, Mfumu. Yayi kele ngunga ya kulonguka bantangu.

²¹⁹ Balukutakanu yayi kele samu na lukanu yina samu na kulonguka bantima ya beto. Nge tubaka milaka yango ya tiya ya meso ya Nge, “ke longukaka mpe zaba mabanza ya ntima.” Kieleka Nge ke salaka, Tata. Mpe pesa beto mvutu mpe na manima tuba na beto na kusala. . . kubumba beto mosi ya kuyilama samu ti ngunga ke na kwiza.

²²⁰ Oh, wapi mutindu beto ke tonda Nge samu na yayi, Tata. Beto ke sala yawu na nyonso yina kel na kati ya beto na lemvo ya Nge. Amen.

²²¹ Oh, beno zola Yandi ve? Ntangu yayi, kana ya kele na nzenza na kati-kati ya beto, ya kele mutindu ya vwandaka na mbandukulu. Ntangu Yesu vwandaka awa na zulu ya ya ntoto, Yandi tubaka, muntu yufulaka Yandi na yina me tala dyambu ya makwela mpe kufwa makwela to kima mosi, Yandi tubaka, “Ya vwandaka ve mutindu yina na mbandukulu.” Beno fwana vutuka na mbandukulu.

²²² Kuna kana na mbandukulu ya vwandaka dibuundu ya Pantekote mpe Yandi kele Vinu, beto kele bintala, konso ntangu yina Vinu ke basisa dibuundu, ya ke vwanda dibuundu ya Pantekote, kintala ya Pantekote; kima mosi yina vwandaka na mbandukulu (Beno me mona?), konso ntangu. Ntangu yayi, beno lenda bwela bavinu yankaka na yawu mpe ya ke pesa mbuma ya yawu. Beno lenda baka yinti ya dilala mpe kutula dilala ya ngayi, ya ke pesa malala ya ngayi yina ke na kuzinga na luzingu ya dilala. Beno tula yinti ya dilalanzi na lweka ya yawu, mpe ya ke pesa mbumba ya dilalanzi samu ti ya kele mbuma ya agrume.

²²³ Na yawu ba-organisation yayi, ba-dénomination mpe nyonso, ya kubwela na ngaanda kuna, ya kubokila Miklisto, ba lenda zinga na nzila ya luzingu ya Muklisto. Ya kel kaka kieleka, kasi bawu ke pesa bambuma ya ba-dénomination. Ya kele kieleka. Samu ti bawu kele ya kubwela na ngaanda mutindu yina. Kasi kana kintala yango yawu mosi kubuta . . . to kana Vinu yina kubuta kintala, ya ke vwanda . . . ya ke sonika Buku ya ba-Actes na manima ya yawu. Ya kele kaka kieleka. Samu ti ya kele yina salamaka na mbala ya ntete. Konso kintala ya ke buta yawu mosi ke vwanda na malala, mosi na mosi. Mpe Biblia me zonzila; ya vwandaka na bintala kumi na zole na zulu ya yawu.

²²⁴ Oh, mu kele na kyese mingi na kuzinga na yisi ya kintala yina, ve? Yinga, tata. Oh, ya kele mbote mingi.

²²⁵ Mbote mingi, beno bambuka moyo mbasi na nkokila awa nsungi ya Phila- . . . ya Sardes. . . ? . . . na kubutaka organisation ya Luther, Martin Luther . . . ? . . .



NSUNGI YA DIBUUNDU YA THYATIRE KNG60-1208
(The Thyatirean Church Age)

BANDANDANI YA LUZAYIKISU YA YESU KLISTO

Nsangu yayi ya Mpangi William Marrion Branham, kulongamaka na Kingelesi, na Kilumbu ya yiya na nokola, na kilumbu ya 8 ya Ngonda ya kumi na zole, na mvula 1960, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org